

EBÈLÙ, NSHAPÌTÀ WA KUMPÀLA



Nenku bwa kufilakù nda—ndambù... Ngeela meeji ne, bwànyì mèmè, kakwèna cintu cîmpè citàmbe Dîyi nansha. “Dii tabuuja dîdi difùma ku diteèleja, diteèleja dya Dîyi dya Nzambi.”

² Mu maadiisâtù, ne pàmwăpa mu maadyâlùmingu, dimwè dya ku masangisha a mu dyâlùmingu, kupèeshakù anu mpaasàtà ndambù wa diikisha, bwalu mmudikumbànyine bikolè, ne mwva ngeela meeji ne tudi pàmwăpa bafwànyine anu kwangata Mukàndà kampànda mu Bible. Tuvwa twenza nanku kale wăwa, ne misangu mikwabo tushàalapù cidimu cijimà.

³ Ndi mvùluka musangu kampànda wutwàkashàlà cidimu cijimà bulubulu pa Mukàndà wà Bwàkabuulwibwà. Kàdi, kaa, ekèlekèle, bintu bitwàkayiiilà, mushindu mwine wùvwăbi bilenga bilayà’s wè! Pashiishe twètù kwalukila cyànyimà e kwangata Mukàndà wà Danyèlè, anyi Mukàndà wà Genese, anyi wà Ekèsòdèdè, ne kuwàngata anu, ku nshapità ne ku nshapità, ne mwikàlè wùtwàngaja anu Bible mujimà pàmwè. Kaa, ndi mèmè munangè anu cyòci aci’s!

⁴ Pashiishe ndambù, nebikèngelè bwa twètù kwangata... Bu Mukalenge mwa kutùngunuka ne kubènesha ne twètù batùngùnùke, netùkabwelè mu bimwè bintu bya ndòndò wa menemene mwômò emu, bya ndòndò wa menemene. Nenku netùye naaci, anu ku kaaba ne ku kaaba, mu Mifùndù yònsò.

⁵ Ne ntu muswè kwikala kupàlakaja Mufùndu ne Mufùndu. Ki mushindu wùdibi ne cya kwikala. Cìdi anu cimfwànyì cinènè cilenga cimwèpelè. Kàdi mu Mukàndà wutùdi tulonga ewu, netwikalè mwa kubwela, kaa, mu lupàndu, ne dyondopa dya kùdi Nzambi, ne bishimà, ne luse. Nenku, kaa, byònsò bìdi bìlwa anu mwômò emu.

⁶ Ne pàmwăpa pândi nkafika mu mushindu wà bikèngela bwa mèmè kufika ku masangisha... Ncítukù anu mmanya ne ndibà kaayi dîngìikalà mu disangisha kampànda, mubiikidìibwE bwa kuya ku disangaisha kampànda to, bwalu ncìtu ne cintu cimana kulongolola to anu too ne pândi ndyùmvwa mulombòdìibwe bwa kwenza cintu kampànda. Ne ciine aci cìdi mwa kwikala kumpàlà kwà màalabà mu dinda, ndi mwa kwangata ndèkè kuya ku Californie, anyi ku Maine anyi ku mwaba kampànda, anu kwònsò kùdiYe mufwànyine kumbiikila aku. Ki bwa cinyi ncìtu ndyànjila kulongolola ngendu minènè, mileemilè ya dyenza to, bwalu ncìtu mwa kwenza abi to. Wànyì mudimu wà bwambi kí mmulongolola mushindu awu to, wùdi wówò anu mushiilàngàne.

7 Nénku mpindyewu ndi mwalùkile kumbèlu anu bwa diikisha ndambù. Ndi mujimije bujitu bwa kilò citeema, mu masangisha a ndekeelu aa. Nénku Mwanèètù Mercier ne Mwanèètù Goad bàvwa balwè, kwénjì katanci, ne kwambabò ne: “Mwanèètù Branham, ndi mmòna cyùdì wèwè wenza. Udi uflakù mwoyi wèbè wònsò.”

8 Mèmè kwamba ne: “S’ki mushindu wùmwèpelè wùdiku mwa kwenzela Mukalenge mushindu mujaalàmè wà mudimu, nkufila byònsò byùdì naabi ku mwalu wà mvità bwa Kilisto; dikàndà dyebe dyònsò, musùukà wèbè wònsò, mwoyi wèbè wònsò, meeji èbè ónsò, byònsò byùdì naabi.” Paùdi wenza cintu kampàndà, ùcyéncé cijaalàmè anyi kùcyénjì to nansha kakese, wamònu’s, ùcilekèlè anu nanku. Wèwè muswè kwikala mwena Kilisto, fila byònsò byùdì naabi kùdì Kilisto, mbwena kwamba ne, díbà dyebe, dimanya dyebe, cintu cyebe cyònsò.

9 Ngáfumu ku dimòna nsongàalùmè ewu. Awu’s mmukàjèèbè’s, Mwanèètù Burns, s’mmwòmò’s, udi wimba cisanji ne misambu mwaba wàwa awu, babàka batekète abu. Ne—ne kí ncisanjì cya pyànò to, anyi kí ncya orgue to, kàdi ncisanjì cya mushindu kampànda, cìdibo bàtuuta nshinga ne bàmbulula, ne bènza cintu kampàndà bwa Mukalenge. Pàmwàpa wèwè udi mwa kwenza nanku, ne kwimba, mbwena kwamba ne, kupeta misùukà. Enzà cintu kampànda, nansha ciikàle cinyi. Wèwè—wèwè mwa kwela kashibà, ee, ela kashibà. Enzà wèwè anu cintu kampànda cyanààna. Filakù anu bujaadiki cyanààna anyi enzà cintu kampànda bwa Bukalenge bwa Nzambi. Cyònsò cyùdì naaci aci, citèèkè ku mudimu wà Nzambi.

10 Mpindyewu, katwàkuteeta bwa kushààla ntàntà mule menemene to, bwalu ndi mumanyè ne nutu nwenza mudimu. Nudi ne cya kubìika kumpàlà kwa díbà. Ne mèmè ndi nya kalemba nshìndi mu dinda dyònsò. Ndi nzwàmbila anu bulelèlà. Kì cìndi munkaci mwa kwenza. Kì cìndi mwalùkidile kumbèlu, mbwà kwikishakù ndambù. Ne pa nanku ndi mbiika, lwà pa díbà inaayi, mpàtuka nya mu diitu ne, ee, nkatwà buluwà ndambù ne nya mu tulù. Nénku nkààdi ngaalujakù ndambù wa bujitu bwine abu, pa nanku nèngiikishèku, paanyimà pàà katanci, bu nwènù. . . bu Mukalenge mwa kwanyisha. Nénku byònsò mbilenga.

11 Eyo, mpindyewu, netùbuululàayi mu Bibles yenu. Ndi muswè bwa nwikalàayi nulwa ne Bibles yenu dilòlò dyònsò, bwa nwènù. . . panwìkalà ne mushindu. Muntu yèyè kàyi nendè to, muntu yèyè muswè kulondesha kubala eku, tudì naayi ndambù kaaba aka, tudì bafwànyine kwikala ne. . . bàmwè bàà ku baawisiyè bwa kuyàbanya. Kùdi muntu nendè dijinga anyi? Ee, ela anu cyanza cyebe muulu cyanààna.

12 Ndi ndìkonka ní Mwanèètù. . . Doc, lwàku apa wàngatè Bibles eyi. Wèwè udikù mwimàne pabwìpi apu awu, ne

Mwanèètù Burns. Ncya bushuwa anyi, Burns? Ngààmumvù wàmba... [Mwanèètù awu udi wàmba ne: “Conrad.”—Muf.] Wamba ne? [“Conrad.”] Conrad. Mvwa mumubiikile... Mémè nkàadi bu udi ne mapàpà, pàmwàpa’s, Mwanèètù Neville. Mmunyi mungààfikiku ku dikapeta dîna dya Burns? Ntu mumanye mpàla wa muntu awu, kàdi nciyi anu mwa, nciyi mufwànyine kutèèla dîna dyèndè to.

¹³ Nenu nudi bamanyè’s, paùdi wenda ukolakù ndambu, ndi njandula cintu cìmwèpelè, bìdi bitàmba kunkolela bwa kubala Bible ewu. Kàdi ndi anu ngumvwa bibi pàndi ngeela meeji a dyasa bìnètè, bwa kubala Bible.

¹⁴ Kàdi, anu abidi àdi panshi aa, nkàavwa ndyàmbedila ne nkàavwa nshàala mpofo. Ki mémè kuya kamòngana ne Sam. Ki Sam kwambayè ne: “Bill, ncyèna mumanye to.” Yèyè ne: “Nènkupetèlè anu cipungidi ne ngàngàbukà kampànda wa mupilùke.”

¹⁵ Mémè kuya ku Louisville. Cìvwa ne cya kwikala diswa dya Mukalenge. Ngàngàbukà kampànda mwendè luumù wa mupilùke; nyewù ngápù dîna dyèndè mwoyi mpindyewu. Kàdi yèyè awu ùvwa mubalè mukànda wànyì. Ki kwambayè ne: “Bwa wèwè walukilakù ku Afrike, ndi muswè nye neebè.” Yèyè ne: “Ne bu wèwè... Beena Afrike abu mbakunangè.” Ki yèyè ne: “Bòbò bàtu ne miitabuuja a màjìmbu mapite, nangàngà mémè mwikàle ne keelè, bwa kukòsa naakù. Nenu,” mwàkambàye, “ndi muswè mfilè ngondo yisambombo ya mwoyi wànyì, bwa dipandangana nsòngà ya mèsù ne bikwabo, ku... mu lwendu lwà bwambi amu.” Ki yèyè ne: “Bu twètù mwa kuya pàmwè, ne wèwè mufwànyineku kubalengeleela, mushindu awu,” yèyè ne, “dìbà adi bòbò ne nsòngà ya mèsù ne bya dipanda dya mèsù,” yèyè ne, “ndi mufwànyine anu kwitaba bwa kucyènza, pàtupù, ngondo yisambombo ya dicyènza.” Kàdi ngápù mwoyi ne ntàntà bule kaayi udi ukèngela bwa kwindila cipungidi nendè.

¹⁶ Nenu tuvwa basòmbèle mu kaacibambalu kakese ne kuteemakù kaabukènkè kakese—kakese kakùnze, mu ndekeelu mwa kaacibambalu kàà mîdimà. Mòna’s, mvwa mwa kubala màleeta awu. Bìvwa bìleeja makumi abidi pa makumi abidi. Mvwa mwa kuàbala mu mushindu wònsò. Ki kupwekeshayè mu dikumi ne itaanu pa dikumi ne itaanu, ne mvwa mwa kuàbala. Nenu kutèèkayè mu dikumi pa dikumi, mvwa mwa kuàbala. Yèyè ne: “Ee, kakwèna lutàtù lwàbùngi ne mèsù èbè to.”

¹⁷ Ki kwangatayè tulòndò tukese twà dimwèna mu ntàntà. Kutèèkayè kalùmyànà kakese paanyimà apu, kaacintu kakese, nudi bamanyè’s. Tulòndò twà kale twà dimwèna mu ntàntà atu, mbanganyi bàdiku batùvùlùke? Tuvwa tutàngidilamù kale wàwa, tutàngila bimfwànyì, anu mushindu ewu. Ki yèyè ne: “Udi mwa kubala aci anyi?”

Mémè ne: “Eyowa’s, mukalenge.”

Yèyè ne: “Cìmbadilèbi tǔng.”

18 Cìvwa ne, kaa, kasaka kajimà, kiiipacila bunene *ebu*. Mémè kubanga, e kucibala; kubangayè kucibàndisha, nùnkú *ewu*, ntambè kuya bitekète bitekète. Kucifikishayè bunene bwìpacila nùnkú *ewu*, mémè kutwà kwimana. Yèyè ne: “Ndi mwa kukwambila cintu cìmwèpelè, ukàadi ne bidimu bipìte pa makumi anaayi.”

Mémè ne: “Eyowa, aci ncyà bushuwa, bipìte apu bikolè.”

19 Yèyè ne: “Udi mufikè ku dyenza ciine aci bìshi?” Yèyè ne: “Dìsù dyetu dya muntu edi, pa ciibidilu, paùdì anu ukùmbaja bidimu makumi anaayi, anu mùdì nsukì yebe yàndamuka mvya amu, ne bikwabo, kamònyì kàà dísù kàdì kàbèetelela.” Yèyè ne: “Mpindyewu, wèwè mutàmbe kwela bidimu, necyàlukilè cyàkàbìdì.” Yèyè ne: “Lumònò lwibìdì alu, mùdìbo bàlùbìikila. Kàdì,” yèyè ne, “muntu wetù ewu, ne bidimu bitwè ku makùmi anaayi, mu bushuwa bwa bwalu neikalè. . .” Yèyè ne: “Kakwèna lutàtù ne mèsù èndè to.”

20 Ndi mwa—ndi mwa kumòna lusukì lwòlò panshì, ulùseemeja kule naanyi. Kàdì paùdì ulùseemeja pawìpì naanyi. . . Ki yèyè ne: “Mpindyewu, udi ubala Bible webè,” yèyè ne, “paùdì umuseemeja kule neebe.” Yèyè ne: “Paanyimà pàà cikindo, dibòkò dyebe adi kadyàkwikala bule bukùmbàne to, mu mushindu wà kùciyi mwa—kùciyi mwa kumuseemeja kule menemene bwa kumukwàta to.”

21 Nénku ki kungenzelayè bìnètè, ne katùpà kàà kwinshì aku, kiikàle bwa kubadilapù. Yèyè ne: “Mpindyewu, mu cyambilu cyebe. . .” Kwelayè meeji ne mvwa umwe wa ku bayiishi banene aba, nudi bamanyè’s. Nénku ki kwambayè ne. . . wèwè. . . Katùpà kàà kuuulu aku kàdì anu kàà lumwènù lwetu lwà ciibidilu lwà ku màdidiishì elu, lumwènù anu lwetu lwà ciibidilu elu. Kàdì katùpà kàà kwinshì kàdì kòkò ne mupimbu wa mushindu kampànda munda amu, bwa ngaamòna mwa kubadila pawìpì, nudi bamanyè’s, nùnkú *ewu*. Pa nanku ntu ngumvwa bibì bwa kwikala kubyàsa; ki mùndì ngumvwa’s.

22 Nénku mpindyewu, mu dilongesha dya Bible, ne mémè ndi ne Dipungila Dipyadìpyà dilòlò edi. Pa nanku bìdì. . . Ndi ne Dipungila Dipyadìpyà dya Collins ne dyòdì ndifùnda ne màleetà bunene bukùmbànekù. Kàdì mpindyewu, pàndì ngaalukila mu mukwabo awu, bìdì mwa kukèngela bwa mémè—mémè kuya ku binyàanaanyi byànyì byà kale abi, ne—ne kubadilamù. Kàdì nansha ciikàle cinyì, ndi—ndi ne disànkà mùndìku ne cintu kampànda bwa mémè—mémè kwikala anu mwa kubala. Nénku—nénku—nénku cyònsò cìndì naaci aci, nèmfilè byònsò bìndì mwa kufila, bwa butùmbì bwa Nzambi, mutèkèmène ne Yèyè neùmushè cimanyinu cya bukùlàkàjì aci. Ncyèna mwa kuMulòmba bwa kuumusha bukùlàkàjì bwànyì to. Ndi. . . Eyowa, aci cìdì anu cintu cìdì cikèngelà bwa twètù bònsò

kwenza. Bikèngela tùpicilè mu cyôci aci. Ne ndi mumanyè ne ncyèna mwànà mutekète mûmvwà kale wàwa to, pândi mwimàne pa cibùmbà cya ku cyambilu eku apa. Nkààdi ne bidimu makumi anaayi ne mwandamukùlù. Kàdi anji elàayikù anu meeji, mu bidimu bikwabo bibidi, nènkhumbajè bidimu makumi ataanu's, Mwanètù Mike.

²³ Ekèlekèle, ndi nciitabuujà ne lutàtu's! Ndi anu . . . Nciwakuù mumanyè ne nkààvwa mupite bidimu makumi abidi to anu pàkaadiku bidimu bitwè ku bibidi apa. Ncya bushuwa. Ncya bushuwa. Ndi anu . . . Nciwakuù mufwànyine kuciitabuujà to. Kàdi pààbi's ndi—ndi . . . Bivwa bikolè bwa mémè kuciitabuujà too ne pàngàalu kuditàngila mu lumwènu, ki dîbà adi mémè—mémè kumanya ne mmwômò's, dîbà adi. Kàdi—kàdi anu pa kutàngila, ndi ndyùmvwa anu bîmpè mùntù ndyùmvwa kacya bândela, ne ndi kabidi ne kusàkidila bwa cyôci aci. Butùmbi bwôsò bwikalè kùdi Nzambi.

²⁴ Mpindyewu, tudi tulonga Mukàndà wa Ebèlù. Bikaadi . . . Kaa, ngùmwe wà ku Mikàndà ya Bible, ya mitàmbe kwikalà ya ndòndò ne mibanjike. Ndi nzwàmabila's, m'Mukànda wikalà cya bushuwa . . . Nzambi Yèyè mwanyishe, ne twètù babwelè mu cyôci eci, ndi ngeela meeji ne netùsanganè bimpokoto bya ngòlò mu mushindu wà ne netwèlè mbilà ya butùmbi bwa Nzambi dîbà dyònsò. Nenku mpindyewu ndi . . .

²⁵ Mukàndà wà Ebèlù, cidìwu cya bushuwa, mbicinka ne m'Mufùnda kùdi Pòlò, muleeji wa Bible wa mutàmbe bunene, ngeela meeji, wa kacya bàà pa buloba bààpeta, pa kuumusha Mukalenge wetù Yesu Kilisto. Ne Pòlò nguvwa utàpulula . . . Mpindyewu, Pòlò ùvwa mulongeshi mulelèlè wa Bible; mbwena kwamba ne, Dipungila Dikùlukulu. Ki Mukàndà wùmwepele wùvwà mufùnda musangu awu, wùbìkidiibwa ne m'Bible. Nenku yèyè ùvwa ùteeta kuleeja beena Ebèlù, ùtàpulula Dipungila Dikùlukulu ne ùleeja ne Dipungila Dikùlukulu dîvwa mundidimbì anyì cifwànyikijilu cya Dipyadiyà.

²⁶ Mwômò amu mene tudi mwa kulenga nshinga udi ufikisha kumbèlu ne kushàala ngondo yisatu anu pa dyeji dimwèpele adi, muwaba awu mene. Bwa kwalukila cyànyimà, bu twètù mwa kubuululakù Bibles yetu mpindyewu, mu bushuwa bwa bwalu tudi mu Ebèlù, nshapità wa kumpàla. Kadi twètù babuulule mu Bwàkabuulwibwà, nshapità wa 12, nudi bafwànyine kucimòna cyàkàbidì anu menemene, mùdi mindidimbì ayi. Bu . . . nwènu bàdi ne crayons yenu ne bìikalà mwa kufùnda Mifùndu. Mu Eb- . . .

²⁷ Mu Bwàkabuulwibwà 11, tudi tusangana ne Yone, mu cisanga cya Paatèmò, wàkamòna mukàji mwimàne mu mauu, mwikalè ne dîbà kumutù kwèndè ne ngondo mwinshì mwa makàsà èndè. Ne mukàji awu ùvwa ùdinyenga bwa kulela, bwa mwànà kulediibwayè. Kulelayè mwànà wa balùme. Dragon

mukùnze ùvwa mwimàne, bwa kudyàye mwánà awu pàvwàye anu ne wàledìbù. Kàdi mwá—mwánà awu wàkangaciibwa mu Dyulu, ne mukàji awu wàkanyeemena mu cipèèlà mùvwàye ne cya kudiìshiiibwa munda mwa cikondo, cikondo, ne cyàbìbìdì cìmwè cya cikondo, anyì citùpà cya cikondo.

²⁸ Mpindyewu, mukàji awu ùvwa cileejilu cya ekeleeziya, ne Mwánà uvwayè mulelè awu ùvwa n’Kilisto. Ngondo mwinshì mwa makàsà èndè ùvwa mmikenji, dîbà kumutù kwèndè cìvwa nngàsà. Mitooto dikumi ne yibidi ku cifulu cyèndè cya butùmbi yìvwa mbapostolo dikumi ne babidi. Nenku ki mwaba awu, ku cìdì . . .Bapostolo dikumi ne babidi bàvwa mbutùmbi anyì dyoya dya Dipungila Dipyadìpyà. Nwamònu anyi? “Bwalu cishìmikidi cikwabo kacỳènakù mwa kutèekiibwa to pa kuumusha cikaadì cimana kutèeka aci.” Nwamònu anyi? Cyòci, Cishìmikidi aci, Dipungila Dipyadìpyà adi—adi, bapostolo, Dilongesha dya bapostolo, ne bikwabo, ki cifulu cya butùmbi cìdì cishìmikidi cya Dipungila Dipyadìpyà. Ne pashìishe ku . . .

²⁹ Ngondo ncindidìmbì cya dîbà. Dîbà dìdì dìfila bukènkè bwàdì anu pàdìdì paanyimà pàà buloba. Ne ngondo ùdì ùfila bukènkè, bwa kwendelamù, bufùku. Nenku aci’s ncimfwànyi cilenga be citùdì naaci kaaba aka, cikwabo cimfwànyi cilenga: dîbà didi dileeja Kilisto; ngo—ngondo ùdì ùleeja Ekeleeziya. Bìdì anu mùdì mulùme ne mukàjèndè amu. Nenku pàdì Kilisto kàyipù to, Ekeleeziya ùdì ùfila Bukènkè bushààdile, Evanjeeliyo. Nenku bùdì—bùdì mBukènkè bwa kwendelamù too ne pàdì Mwánà ùpàtuka cyàkàbìdì, dîbà adi Ekeleeziya ne Mwánà, ngondo ne dîbà, bìdì bìnwàngana. Nwamònu anyi? Ngondo ùdì citùpà cya dîbà, ne Ekeleeziya ùdì citùpà cya Kilisto. Nenku pàdì Kilisto kàyipù apu, Ekeleeziya ùdì ùfila Bukènkè Bwèndè. Ne pashìishe bu mutùdì cya bushuwa mwa kumòna ngondo ùkenka, mmumanyè ne dîbà didi dikenka mwaba kampànda. Ne pàcìdì Ekeleeziya ùfila Bukènkè bwa Kilisto, Kilisto ùdì ne mwoyi mwaba kampànda. Amen. Elàngànaayipù meeji.

³⁰ Mpindyewu, mikenji yìvwa cifwànyikijilu cya ngàsà, kàdi mikenji kayìvwa ne bukolè bwa disùngila munda mwàyì to. Mikenji yìvwa yòyì anu . . .Mikenji yìvwa anu mmpùlushì. Mpùlushì ùdì ùkwela mu bùlokò, kàdi, nudi numòna’s, bikèngela ngàsà bwa kukupàtula mu bùlokò amu. Nwamònu anyi?

³¹ Pa nanku Mashi a Kilisto, Evanjeeliyo, ngàdì àtùsùngilà ku mpekaatu. Mikenji yìdì yitùvwija anu bangènzàmpèkààtù cyanààna. Mikenji yòyì mmyambè anu ne: “Wèwè udi ngènzàmpèkààtù. Kwibi. Kwèndì masandi. Kùfidi bujaadiki bwa mashimi.” Nwamònu anyi? Mmpùlushì udi wamba ne wèwè udi mwenzè bibì ne udi mupiile. Kàdi Evanjeeliyo nduumù lwìmpè. Kilisto wàkafwà bwa kutùsùngila ku matomboka ètù ònsò, dishipa dya mikenji. Kilisto wàkafwà bwa kutùpàtula.

32 Mpindyewu, Pòlò, mmwenzè anu ùkùdimuna mucìma, kààkakònkakù bwalu kùdi sèminèrè nansha umwe, anyi kààkakònkakù bwalu kùdi bambi kampànda to. Kàdi nukààvwakù bamòne anyi? Yèyè wàkaya mu Arabie, ne wàkashàalamù bidimu bisatu, mu Arabie amu. Mpindyewu, eci cidi, bwa ku wànyì mmwènenenu, ne . . .

33 Mpindyewu, bikèngela tùpetèku pàà kushìndamijila cyòci eci, díbà adi netùmanyè mùdici ne musinga wà menemene. Nenku dileesònà dya kumpàla, dilòlò edi, tudì twangata mwaba wètù wa kubìshìndamijila.

34 Mpindyewu, Pòlò ùvwa mulongeshi wa dikèma wa Bible, bwalu wàkalongeshiibwa ku makàsà a mulongeshi munene mwendè lumù wa bikondo byònsò awu, Gàmaalièlè. Ne yèyè ùvwa umwe wa ku bàà batàmbe kumanyika bimpè bàà ditùkù adi, mulongeshi munene wa mikenji ne bapròfètà awu. Pa nanku, Pòlò ùvwa mulongeshiibwe bimpè mu bintu abi.

35 Ne pashìishe ndi mumuswè mu mushindu ewu, dibuulula dinene edi, mwikàle ne meeji matòòke mu mwoyi wèndè, mushebeyanganyi, ùvwa mwitàbe bwa lufù lwà Stèfanò ne wàkamòna Stèfanò ùfwa ku mabwe ne mangùlùbà àkamwasàbo too ne mwàkafwàye. Ngeela meeji ne civwa ne cya kwikalà cipicile Pòlò pààkamònàye Stèfanò wèla byanza muulu mu Dyulu, ne wàmba ne: “Ndi mmòna Maulu muunzulula. Ndi mmòna Yesu mwimàne ku dyàbalùmè dya Nzambi.” Ne kwambayè ne: “Taatù, kubàbalùlwìdiku bujitu bwa mpekaatu ewu to.” Ki kuupukayè mu tulù.

36 Nukààvwakù bamòne aci anyi? Yèyè kààkafwàku to. Wàkuupuka mu tulù. Anu mùvwà. . . Ngeela meeji ne yèyè kààkumvwakù dibwe dikwabo òmwasa to. Anu mùdi mwànà wa mu dibòkò mu cyàdi cya mamwèndè amu, ùpuka mu tulù, Stèfanò wàkuupukila mu tulù mu mabòkò a Nzambi.

37 Kùdi cintu kampànda, kùdi Pòlò, cyàkamupicilà. Pashìishe yèyè, muntu kanà yònsò wa mutwìshìibwe ewu, ùteeta bwa kuCilwisha, ùdi ùya kùdi mwakwidi munene ùkapeta mikàndà ya njila. Kwambayè ne: “Nènkwatè bantu bònsò bàdi bènza mutooyi wònsò awu abu, ne baabuludyanganyi abu;” mùvwàbo bàbàngata’s, citùdi twètù bafwànyìne kubìikila leelu ewu ne, “mukoleshi wa maalu wa muumishe mwìsù,” anyi cintu cya mushindu awu, bènza mutooyi bùngì cyanàànà ne bènza cimvundù. “Netùye anu kuntwaku ne kujikija bwalu abu.”

38 Kàdi mu njila wènda ùya, njila mukese wa kale. . . kaciyi cibeeba cyalàbàle bu mùdi bitùdi twendelamù ebi to. Ne miine njila ya mu Pàlèstìnà ayi, anu tuumipwa tukese cyanàànà, cyenzè mùdi mupwa wa ngombe mu diitu mùtù ngombe, ne mikooko, ne tubalù, ne mpundà, ne tuumeelù, bibàndila pa tukùnà.

39 Nenku Pòlò, mu njila mutàngile ku Damàsèkè, lwà pa díbà nkànkalà, díngà ditùkù, Bukènkè bunene butùme nsèsà panshi e

kumubyànkulabù panshì. Muntu nansha umwe kààkaBùmòna to anu Pòlò. Ndi muswè bwa nùmone aci. Nenku mwaba ewu mene, mpindyewu eci kî ngàmba bwànyì mèmè nkààyaanyì to, kàdi anu bwa twètù kubwela mu mwaba wa kushìndamijila bitùdi twamba ebi's. Bwa nùmanyè ne Yesu umwèumwè awu . . .

40 Mpindyewu, pàvwàYe pa buloba apa, Wàkamba ne: “Ndi mufùme ku Nzambi, ne Ndi ngaalukila ku Nzambi.”

41 Mpindyewu, pààkalombolàYe bàna bàà Izaleela, Yèyè ùvwa Dikunji dya Kapyà. Ki kuvwijiibwaYe mubidi, pashìshe kwalukilaYe ku Dikunji dya Kapyà dimwedimwe adi. Ne pààkatuutakeenàYe ne Pòlò mu njila wa ku Damàsèkè, Ùvwa Dikunji dya Kapyà adi, Bukènkè abu, nwamònu's, Bukènkè bunene. Ki Pòlò kwambayè ne: “Nganyì awu Ùndi nkèngesha?”

42 Yèyè ne: “Ndi Yesu, Ùdì ukèngesha,” Bukènkè's. Kaa, Yèyè kî ngwa ùkèmesha anyi?

43 Kàdi's ki Yèyè ewu, dilòòlò edi, mwikàle neetu kaaba aka mene. MmuDìkwàcishe fòtò kuntu kwàka, Cintu cimwecimwe aci, nwamònu's, Dikunji dya Kapyà, Bukènkè, umwèumwè anu muvwaYe amu, “Umwèumwè awu makèlèlè, leelu, too ne kashidi.”

44 Mpindyewu bantu bàvwà nendè abu kabààkamòna Bukènkè abu to, kàdi Bùvwa mwaba awu nansha nanku. Bipeta byàkafidiibwà bìvwa anu byòbì bimwebimwe abi.

45 Mpindyewu, bìdikù mwa kwenzeka ne—ne muntu mmufwànyìne kumòna Kilisto mu citanda emu cibì mukwabo nansha umwe kàyi ùMumòna anyi? Cya bushuwa's. S'cyàkenzeka mwaba awu.

46 Cyàkenzeka kabidi bufùku kampànda pàvwà Peetèlò mu bùlokò. Nenku Bukènkè abu bwàkabwela mu bùlokò amu, kulengaBù Peetèlò, ne kupicilayè anu pabwìpì ne mulami wa munda, mulami wa pambèlu, kuyayè ku ciibi, ku ciibi cinène, too ne ku ciibi cya cimenga. Peetèlò kwambayè ne: “Ndi ne cya kwikala ndòòta's.” Kàdi dya ùkènzakana anyi, Bukènkè abu bumbè buyè; Kilisto, Bukènkè bwa Cyendeleele, bwa kashidi abu's. S'ki Yèyè awu. Mpindyewu, mu njila wènda ùya . . .

47 Kàdi tàngilàayi, cikwabo cintu, patwikalà bafwànyìne kwakula bwa eci, cyàmvwidì mu meeji anu mpindyewu ewu. Kàdi beena meeji bàvwà bènda bàlonda Mutooto awu abu, njila mujimà kacya anu ku Inde kwàka, ku Mubàndu, ngondo ne ngondo, bàpicila mu bibandabanda ne mu bipèèlà (bàpita nzùbù ya bijoojedi; ne biikàle bàtàngidila dībà dya bufùku ku mitooto) ne mufùndi wa maalu-malonda anyi muntu nansha umwe kàyikù mutèèle ne bààkamònakù Mutooto awu to anu beena meeji abu. Bivwa bibàlongolwela anu bòbò bwa kuWùmònabò.

48 Pa nanku's wèwè udi mwa kumòna bintu bìdì mukwabo muntu kàyikù mufwànyìne kumòna to. Bwèbè wèwè, Cidi

mbulelèlè. Bwèndè yêyè, kèna ùmvwa to. Anu mùdì dikùdimuna dya mucima's; wèwè udi mwa kwikala mukùdimùne mucima ne usànkila mabènesha a Nzambi, mwikàle anu—anu unwina mu mabènesha a Nzambi. Kàdi muntu udi ku luseke awu, musòmbe ku luseke kwebe: “Mèmè ncyèna mmòna cintu to.” Nwamònu anyi? Nwamònu anyi? S'ki cyôci aci. “Mèmè ncyèna anu mbyùmva to. Ncyèna anu mmòna ne bìdi bìshi biine byònsò ebi to.” Ee, kèna anu ùCyùmva to. Kwàjikì. Pàdìbi ne, wèwè kaayi udi umvwa.

49 Mònaayi mpindyewu, Pòlò mu njila wènda ùya. Dilabula dinene edi ndyenzè anu dimwenzekela anyi...Mpindyewu, kabìvwa anu bimutwile to...Ki cìdì cyèza ne Pòlò ikalè mwîmpè nanku awu.

50 Mpindyewu, dileesònà dyetu dilòlòlò edi kî ndya ndòndò to. Ndileesònà dya kadìyi dya ndòndò to, kàdi, kaa, netùbwele mu dya ndòndò, paanyimà pàà katanci. Kàdi edi ndileesònà dya dipepèle menemene, kàdi dìcìdì anu dìcìbangilakù. Nenku cìdìdì, ncintu cimwèpelè, nkuzànjika Yesu Kilisto. Pòlò, bwa kubanga.

51 Kàdi kumpàlà kwa yêyè kwenza cyôci eci, Pòlò ùvwa mumanyi wa dibàla wa Bible. Ne mumanyi wa dibàla wa Bible kàadyàkweyemajlakù dilongesha dyèndè pa malabula to. To, mukalenge. Yêyè kàadyàkutèkelakù dilongesha dyèndè pa dilabula to. Wèwè udi mwa kwenza dilabula dya mushindu kanà wònsò ewu. Kàdi dìdì ne cya kwikala EMU MMÛDÌ MUKALENGE WÀMBA. Cya bushuwa.

52 Mpindyewu, mu Dipungila Dikùlukulu, bàvwa ne mishindu yisatu yìvwàbo mwa kumanya mukenji kampànda. Dyàmbedi, mikenji, yìvwa yôyi anu mikenji cyanààna. Pashiishe, bàvwa ne—ne mupròfetà; mulòoci wa bilòotà; ne bàvwa ne Ulimà-Tuumimà. Mpindyewu aci cìdì mwa kwikala cya ndòndò ndambù.

53 Ulimà-Tuumimà ùvwa ncibwikilu cya pa cyàdì cìvwà Aalònà ùvwàla pa cyàdì. Mwômò amu mùvwa mabwe dikumì ne abidi: jaspe, sardoine, escarboucle, ne makwabo, too ne ku ndekeelu. Bàvwa ne mabwe manene ònsò dikumì ne abidi awu, àvwà pa cibwikilu cya pa cyàdì awu, cìleeja ne yêyè nguvwa mwakwidi munene wa cisàmbà ne cisàmbà cyònsò, bisàmbà dikumì ne bibidi bya Izaleela abi. Cibwikilu cya pa cyàdì eci cìvwa cikùdika ku dikunji mu ekeleziya. Ne pàvwa mupròfetà wàmba cipròfetà, ne bòbò baswè bwa kwikala batwìshìbwe ne cìvwa cya bushuwa, anyi kacìvwa cya bushuwa, bapròfetà anyi balòoci bàà bilòotà abu bàvwa bìimana kumpàlà kwa Ulimà-Tuumimà ewu, ne yêyè ùvwa wàmba cilòotà cyèndè anyi cikèènà-kumònà aci, cyònsò cìvwàye mumòne aci. Nenku piikalàbì ne Bukènkè Bunsantu abu...Kaa, nudi nucimòna anyi? Nzambi ùvwa misangu yònsò anu ùsòmbela mu cipaapu cya citàmbe-mfùkilu. Kasumbu aku, makènkè awu, àvwa anu

ètù a ciibidilu aa pàvwa díyì edi kadiyi dipàtuka. Ne pàvwa díyì adi dítuuta ku mabwe awu, dyòdi kadiyi ditàmbe-mfùkìlu to, cìvwa cìshààla kacìyi cyènza cintu to. Kàdi cyòci citàmbe-mfùkìlu, Makènke ònsò awu àvwa ònso pàmwè àleejà meekala a mwanzankòngòlò. Amen. Dìbà adi, awu n’Nzambi uvwa wakula ne: “Awu mmupròfetà Wanyì.” Anyì ne: “Aci cilòòtà ncifùmìne Kùndi.” Nku Ulima-Tuumimà kùvwàbò bàjingulwila.

⁵⁴ Nudi bavùlùke Shawùlà pàakatwàye cìmpìngà apu anyì? Wàkamba ne kàvwa mwa kupeeta cilòòtà to. Ne mupròfetà, Samwèlè, pèndè mumanè kufwà, ne kakùyìkù mushindu to. Kwambayè ne: “Nansha Ulima mene kí mmuswè kwakula naanyì to.” Cintu nansha cìmwè. Shawùla wàkiimana kumpàlà kwa Ulimà, kàdi mèyì èndè àvwa mashààle mèyì mafwè. Nwamònu anyì? Nzambi wàkamubènga. Nenku Ulimà-Tuumimà awu, ki cìvwa cìshindikì cya Aalònà cya bwakwidi bwèndè. Paanyimà pàà Aalònà mumanè kuya, Mòsà, ci-cibwikìlu cya pa cyàdi aci cyàkashààla cikùdika ku dikunji.

⁵⁵ Mpindyewu, bwakwidi bwa Aalònà bwàkajika pààkafwà Yesu. Nenku mpindyewu, patùdi tutàpulula mikenji ne ngàsà apa, tucidi anu ne Ulimà-Tuumimà kampànda. Ne Pòlò ùvwa ùkwàta Nèndè mudimu. Nwamònu anyì? Ulimà-Tuumimà leelu ewu n’Diyì dya Nzambi didi kadiyi dífwa, dya Cyendeleele, dya kashidi adì. Nwamònu anyì?

⁵⁶ “Bwalu ewu yònsò wadìdinga kuumushila ku Mukàndà ewu, anyì kuKùsàkidila ní ncinyì ní ncinyì.” Mèmè ncyèna muswè ní ncinyì ní ncinyì cìdì kacìyi munda mwàWù to, kadi ndi muswè cyònsò cìdìWu naaci. Ki Ekeleeziya utùdi tukèba nyèyè awu. Ne bintu byònsò bidi ne cya kujaadikiibwa anu ku Diyì.

⁵⁷ Ki bwa cinyì anu abidi àdi panshì aa ndi mutuutè cisúsù cibì munkacì mwa beena Mpenta, bwalu, mvwa mwambè ne: “Ncyèna mufwànyinekù kuumvwa ne pàdi maanyì àkuzòlolokelà mu byanza, anyì mashi mu mpàla ne, ncimanyinu cya ne wèwè udi ne Nyuma Mwímpè to.” Aci kí ncyà mu Mifùndu to ne mèmè—mèmè ncyèna mufwànyinekù kucyàngata to. Bikèngela cìfumìne mu Diyì.

⁵⁸ Nenku mpindyewu, Pòlò, yèyè ùvwa munangè anu Diyì. Pa nanku, kumpàlà kwa kuflayèku bujaadiki bwa dilabula dinene dyàkenzàye edi, wàkaya mu Èjiipitù ne wàkenzamù bidimu bisatu. Ngeela meeji ne bìvwa mbìdimu bisatu, bidimu bisatu mu Èjiipitù. Ne nudi bamanyè cìndì mèmè ngiitabuujà ne ncyàkenzàye anyì? Ndi ngiitabuujà ne wàkangata Dipungìla Dikùlukulu, ne wàkakèbulula mu Dipungìla Dikùlukulu dijimà, ne wàkasangana ne Yèyè awu ki uvwa cya bushuwa Maasiyà wa kàyì dyela mpatà to. Bìvwa bikèngela bwa yèyè kujaadikila dilabula dyèndè ku Bible. Amen. Kaa, ekèlekèle!

⁵⁹ Mutàngilaayi pàvwàye mu bùlokò apu. Nudi numòna’s, kùdi ci—cipòlò cya cikondo cya nsòmbelu wa Pòlò pàvwàye

mu bùlokò amu ntàntà mule. Kufùndayè Mukàndà wà Efèsò. Kufùndaye Mukàndà mutùmina beena Ebèlù ewu. Nwamònu anyi? Ùvwa ne dîbà. Nzambi wàkamutèèka ku luseke mu bùlokò amu, ki kufùndilayè maèkèleeziyà awu Mikàndà eyi. Wùmwè mufùndila ekeleeziya wa ku Efèsò. Kufùndayè wùmwè kuwùtùmina ekeleeziya wa Mpenta, mupetè naabo bilumbù búngì kabùyi kwamba. Ekeleeziya wa beena Mpenta ngwàkapetayè nendè bilumbù byàbúngì kutàmba nì nganyì mukwabo yònsò. Yèyè's ùcidi anu naabi. Kàdi ùvwa ne kusàkidila bwa bwalu bwabo. Cintu cimwèpelè cìvwàyekù mufwànyine kubàlongesha. . . Pàvwàbo bàlwa: umwe ùvwa ne musambu, mukwabo ùvwa ne disaluka, mukwabo ùvwa ne njiyà kampànda. Yèyè kavwakù mwa kwakula, kubàmbilakù bwa “Dikubiibwa dya Cyendeleela” to. Kàvwakù mwa kubàmbila pa, “didyànjila-kulongolola” to. Kavwàku mwa kwakula naabo to, bàvwa bàna bàà mu mabòkò. Bìvwa bikèngela—bìvwa bikèngela bwa bònsò kuumvwabò cintu kampànda, anyi kumònabò cintu kansanga, anyi kwikalakù ne njiyà ya pabwàyi, ne, anyi cintu kankènga mu nyungulukilu wabò amu, bileeji kampànda.

⁶⁰ Kàdi ndi ngeela meeji ne, pààkaakulàye ne beena Efèsò, ùvwa mwa kwakula pa: “Nzambi mmudyànjlile kutùlongolola bwa kwikala bàna bàà balùme ne bàà bakàji, ne mutùtèèke bu bàna mu Yesu Kilisto kumpàlâ kwa difùkâ dya dyulu ne buloba.” Tàngilàayi aci. Ekèlekèle!

⁶¹ Mutàngilaayi pàdiye mukafikè mu Mukàndà wà Loomò, ne bikwabo. Bòbò bàvwa bantu bakolè. Kaa, bàvwa bààkula mu myakulu, cya bushuwa, ne bàvwa ne bikwabo bimanyinu bya Nyuma Mwimpè munkaci mwabo. Kàdi kabààkenza malongesha, ne masaluka, tuumizakalu tukese, ne njiyà ya pabwàyi to.

⁶² Pólò kwambayè ne: “Nwènú—nwènú—nwènú nudi nuya naabi ne kwa cyanàana. Pavwàbi bikèngela bwa nwènú kwikala nulongesha, nucidi anu bàna bàà mu mabòkò ne bikèngela kwamwa mabèèle.”

⁶³ Mpindyewu, ki cìntù anu misangu yònsò muteetètètèete ndwangana mvità bwa tabernacle ewu kwikalayè's, kanùyi musumbà wà bàna bàà mu mabòkò to. Twikalàayi bantu bakolè. Ikàlaayi biimànyine mu njila. Kaa, ekèlekèle! S'ki bwalu abu.

⁶⁴ Pa nanku, Pólò kwànji kuyayè kuntwaku, dyàmbedi, bwa kumòna dilabula dyèndè ní divwa dikùmbanangana ne Bible wa Nzambi.

⁶⁵ Kaa, kî mbifwànyinekù kwikala bilenga bilayà anyi, leelu ewu, bu bantu mwa kwenza cyàkàbidì anu cyòci aci, bu twètù mwa kwenza ne dilabula dyetu dikùmbananganè ne Bible wa Nzambi? Dyòdi kadìyi nanku to, dîbà adi dilabula dyetu ndibi; kadyèna dipenya bukènkè mu Ulìma—Tuumimà to. Dyòdi dipenyaMù, amen, wèwè udi umanya ne udi naaCì. Kàdi dyòdi

kadiyi nanku to, bàmwè. . . nansha òmwèka òmpè dya bishi, nansha òmwèka bu ne òwà dilelèlè; makènkè awu òwò kaayi mapenyè pa Ulimà-Tuumimà apu to, cìvwa cya mafi.

⁶⁶ Nenku dilabula dyùdì mwenzè nansha diikàlè dyàbùngì bìshi, nansha òmwèke dilelèlè bìshi, nansha dyòdì dya òdìleeja bìshi, nansha dyòdì dya òlongeshangana bìshi, nansha diikàlè cyamù cinènè cya mudimu bwa kupeta misùukà; dyòdì kadiyi òpenya mu Diyì amu to, ndibi. Cya bushuwa. Bikèngela òdìtèkè mu njila wa Diyì.

⁶⁷ Mpindyewu, mèmè ntu ngiitabuuja mu. . . kùdi munkaci mwa njila. Njila, mpindyewu, misangu yàbùngì. . . Kale wàwa mwva nya mu ekeleeziya wa ba-Nazaréens. Mukalenge abeneshèku bananga abu. Ba-Méthodistes bàà cyena-kale bajidiibwe abu, s'ki cìdibo; beena église de Dieu, ba-Nazaréens, ba-Pelérins de la Sainteté, ne yàbùngì ya ku ekeleeziya mimpè ya cijila ya kale ayi. Yivwa ne ciibidilu cya kwimba musambu ne:

Ndi ngendela mu cibeeba cyalàbàlè cya kale,
Ngenda ngambilangana kwònsò kúnyaayà ne,
Mbipiciibwe ne mèmè mwikàlè mwena Kilisto
wa cyena-kale, Mukalenge,
Pamutù pàà nî ncinyi cyònsò cìndiku
mumanyè.

⁶⁸ Bimpè. Bilenga be. Ne pashìshe bàvwa ne ciibidilu cya kwakula bwa cibeeba cya cijila. Mpindyewu, nwènù babalè cyòci aci, bàdi bàcyàngacila mu Yeshàayi, nshapità wa 35. Mpindyewu, bu nwènù mwa kumòna, mmwambè ne: “Nekwikalè cibeeba, *ne njila*.”

⁶⁹ Mpindyewu, *ne* mmutwàngaji. Nwamònu anyi? Cibeeba, kacivwa cibeeba cya cijila nansha. “Neciikalè cibeeba, *ne njila*, ne nebàmubiikilè ne: ‘Njila wa cijila,’” kî ncibeeba cya cijila nansha. “Njila wa cijila!” Ne njila wa cibeeba mmunkaci mwa cibeeba amu. Mbamwibàke mushindu *ewu* mu mushindu wà ne màyi neàsukulè bùyafù, àbùtùmè ku nseke yònsò yibidi, àlama cibeeba aci cisukula. Pàtupù, nudi ne bijibajiba bisanganyibwa mu cibeeba cyenu amu, òbà dyònsò, bòbò kabàyi bacibàke bimpè. “Njila” mmunkaci mwa cibeeba.

⁷⁰ Mpindyewu, ku *elu* luseke, pàdì bantu bàkùdimuna mucìma, meeji àbò mmatèèka buludì pa Kilisto. Kàdi bòbò bìikalakù anu banangè dilonga, ne kabàyi bàshààla mu disambila to, nebàkwatè mashika makolè, ne bakàyàbàlè, ne buumàkàne, ne kabàyi bàcyùka myandà to. Ne pashìshe bòbò bìikalakù anu beena dibìnduluka ndambù, kanùyì batàngìlè bimpè to, nebàshaalè anu buumishi bàà maalu ne bapàlè, ku *elu* luseke, nwamònu’s, bàbwela mu masaluka ne bikwàbo byònsò.

⁷¹ Mpindyewu, kàdi, Ekeleeziya mulèlàlè ng’Evanjeeliyo mulèlèlè wa ngeelèlù mujaalàme wa meeji, munkàcìnkaci mwa cibeeba menemene amu. Kènà wa mukwàte mashika ne

muumàkàne to, anyi kèna ne dikolesha dya maalu nansha. Ng'Evanjeeliyo mwimpè wa dikèma, wa kale, wa luuyà, wa dinanga dya Nzambi dya mu ndòndò wa mwoyi, wèndela anu buludì munkàcìnkacì mwa cibeeba, ùbìikila bàdì ku nseke yònsò yibidi. Ncya bushuwa. Mpindyewu aci ncìdì. . . Kàdi neupètè Ekeleeziya wa nanku awu bìshi? Ùpàtukila buludì mu Dìyi, Ulimà-Tuumimà.

⁷² Mpindyewu, Pòlò ùvwa muswè kufikisha ekeleeziya ewu anu munkàcìnkacì menemene mwa cibeeba, pa nanku kuyayè ne kulongayè munda mwa bidimu bisatu Mifùndu yìvwàye mumanyè ayi. Ki bwa cinyi, Pòlò ngudi mufunde citùpà cya citàmbe bunene cya Dipungila Dipyadipyà edi. Nzambi wàkamwenzeja aci bwalu kùvwa kùlwa cikondo cya bàà Bisàmbà bya bende. Maatàayi, Maakò, Luukà ne Yone, Evanjeeliyo yinaayi ayi, bóbò bàvwa beena Yudà. Kàdi Pòlò ngudi mufundilàngàne mikàndà ya mipìte bìngì.

⁷³ Mpindyewu mònaayaaku, mpidyewu, netùbangè bwa kwangata cishìmikidi eci mpindyewu, mwaba wùdiye, munkacì mwa kuCifùndila, mu bùlokò amu. Ne yèyè mmupètè dilabula dyònsò edi. Kàdi, dyàmbedi, dilabula edi dyàkanji kujaadikiibwa, ne ewu ki mukàndà wèndè wà mushinga mutàmbe bukolè ku cyòcì aci. Ewu ki mukàndà wèndè wà mushinga mutàmbe bukolè. Loomò ne Efèsò, ne bikwabo, yidi ne kàayi kaaba, kàdi ewu ki mukàndà wèndè wà mushinga mutàmbe bukolè.

⁷⁴ Mpindyewu, nshapità wa kumpàla mujimà ùdi ùzànjika Yesu, ne ùMutàpulula ku diikalà mupròfètà. Aci ncyenabwalu cijimà mpindyewu. Nènteetè kukùfika lùkàsà ne mwànyì mwònsò mpindyewu, bwa katùshàadi ntàntà mupitèpite bule to. Cyena-bwalu cijimà aci *cidi* citàpulula nshapità mupyam- . . . mupyamùpyà . . . Nshapità wa kumpàla awu ùdi ùtàpulula Yesu ne mupròfètà kanà yònsò, anyi mikenji kanà yònsò, ne bikwabo, ne ùleeja ne Yesu ùdi Nganyi. Mpindyewu tàngilàayaaku, “Nzambi.” Tudi tubanga, mwakù wà ntwàdijilu, “Nzambi.”

Nzambi, ku kalekal- . . . uwwa mu bikondo bya kale . . .

Kale mbwena kwamba ne “bishààle byàbya,” cikondo cya cishààle.

*. . . bikondo bya kale ne mu mishindu
mishùlèshùlàngàne wàkaakwila mu bikondo bishààle
ne baataatù kùdì bapròfètà,*

⁷⁵ Mpindyewu, mònaayi: “Nzambi, mu bikondo bya kale, bishààle byàbya, Yèyè wàkaakwila ne baataatù kùdì bapròfètà.” Ki mwàkakèngelàbi bwa Yèyè kufila Mukenji Wèndè, nkùdì mupròfètà Wèndè.

⁷⁶ Nzambi ùvwa ùtùma mupròfètà Wèndè bu mùdì Eliyà, Yelèmiyà, Yeshàayi. Ne bu nwènù mwa kumòna bìmpè, kacya mu maalu-malònda ònsò a buloba, ekeleeziya kàtukù mwanji

kupàtula mupròfetà to. Cikenkètaayi mu Dipungila Dikùlukulu, mu Dipungila Dipyadipyà, anyi mu ditùkù edi, mu ditùkù dya ndekeelu edi. Ndeejààyikù mupròfetà ukàadikù mujuudiibwe mu ekeleeziya mu ditùkù dya ndekeelu edi. Ndeejààyikù umwèpelè ukàadikù mujuukè, umwèpelè. Ne ndejaàyikù cikondo kampàndà cikaadiku mupròfetà, musadidi mulelèlè wa Nzambi, utù ndongolwelu wa bukwántèndeleeleu kayikù mupiishe.

⁷⁷ Anjì elààyibi meeji pa bwalu abu. Yelèmiyà, Yeshàayi, too ne mu Dipungila Dikùlukulu dyònsò amu, s'batu bàcipiissha. Yesu wàkamba ne: “Nudi nulengeja nkità ya bapròfetà ne nuyitòoksha ne lupèmbà, pèènu nwènu's ki bàakabèlamu.” Ncya bushuwa.

⁷⁸ Ekeleeziya's ùcidi anu mutùngùnùke naaci. Tàngilàayi Patrick Munsantu. Nwènu beena Katolike nudi nwamba muvwàye wenù. Yèyè kàvwa mwena Katolike kuntàmba mèmè ewu to. Ncya bushuwa. Kàdi nwènu's nudi nwamba muvwàye wenù.

⁷⁹ Tàngilàayi Munsantu François d'Assise. S'nutu nwamba muvwàye wenù. Yèyè kàvwa mwena Katolike kuntàmba mèmè ewu to.

⁸⁰ Tàngilàayi Jeanne d'Arc. S'nwákamwoshila ku dikunji, bu ne mmuloji, anu bwalu ùvwa ùmòna bikèèna-kumòna ne ùvwa wa nyuma. Nwènu kumwoshila ku dikunji. Kàdi mukàji awu ùlomba luse ne mbilà mikolè, kàdi bôbò kumwoshila ku dikunji. Paanyimà pàà nkàmà ya bidimu, kujandulabò ne ùvwa mupròfetà. Yèyè's ùvwa musadidi wa Nzambi. Kaa, mu bushuwa bwa bwalu, nwènu's nwákambula cibawu cinène: nwènu kujuula mibidi ya bansaserdose abu ne kuyiimansha mu musùlu.

⁸¹ “Nudi cya bushuwa nulengeja nkità ya bapròfetà, pèènu's nnwènu bàakabèlamu.” Cya bushuwa. Kacya ndongolwelu wa bukwántèndeleeleu kàtukù mwanjì kupatula mulùme wa Nzambi to; kacypù, kàtukù mumupàtùle leelu, ne kàadyàkumupàtulakù to. Ntèndeleeleu mudìlongolwela kacya kàtukù mwanjì kwikala cyena-bwalu cya Nzambi to.

⁸² Ekeleeziya mudìlongolwela wa mutàmbe kwikala wa kale pa buloba ng'ekeleeziya wa Katolike; Luther, ki mwibìdi; pashiishe kulwakù Zwingli; paanyimà pàà Zwingli, kulwakù Calvin; Calvin, too ne, ba-Anglicans, ba-Anglo-Saxons kwangatabò pààbò, pashiishe ekeleeziya wa ba-Anglicans; ne Mfùmù Henry wa Mwandamukùlù, pàakatontololàye, ne bikwabo; anu nanku too ne ku ba-Méthodistes bàà Wesley, ne ba-Nazaréens, ba-Pèlerins de la Sainteté; anu nanku too ne ku bàà ndekeelu, ki beena Mpenta, bònsò mbadìlongòlòle. Ne Bible ùdi ùlongesha anu pa bùtookà ne ekeleeziya wa Katolike mmukàji wa—wa lumù lubi, ne ekeleeziya ya Mishòonyi ne malongolodi àyi ki

bàna bèndè bàà bakàjì, Bwàkabuulwibwà 17. Aci kaayi ncyà bushuwa menemene. Pa nanku bàdi . . .

⁸³ Mpindyewu, kî mbantu to. Mùdi bantu bîmpè mu ekeleeziya yònsò ayi; bantu bansantu, basùngidìibwe. Kàdi Nzambi kèna ubiikidila bantu Bèndè ku bulongolodi kampàndà nansha. Ùdi ùbàbiikila bu bantu-nkààya. Nzambi ùtu bwalu ne bantu-nkààya, nansha wèwè Méthodiste, Baptiste, mwena Mishònyì, ne mwena Katolike, anyì cyònsò ciwikalà aci. Nzambi, kumpàlà kwa difùkà dya dyulu ne buloba, wàkakumanya, ne wàkadyànjlila kukulongolola bwa Mwoyi wà Cyendeleele, anyì wèwè uvwa mulongolwela dijimina dya Cyendeleele. Kabiya. . .

⁸⁴ Yèyè kàvwa muswè bwa wèwè kwikala mubùtùke, bwa wèwè kubùtùka nànsha. Kàdi, bu mùdiYe kàyi ne mikàlu to, Ùvwa ne cya kumanya ndekeelu kacya anu ku cibangidilu, bwa cyanànà Yèyè kî n'Nzambi to. Pa nanku Yesu kààkalwakù pa buloba anu bwa kwamba ne: “Ee, Nèmonèbi muntu kampàndà ní ùdi mwa kufwà luse. . . Mèmè mwenzè cyenzedi ne mufwè, mu mushindu mukolè, pàmwàpa nebèlè meeji ne: ‘Ee, ndi. . .’ Necì—necìtwishishè myoyi yabo, ne nebìikalè. . .” Nzambi kàtu wènzà maalu Èndè mushindu awu nansha.

⁸⁵ Yesu wàkalwa mbwà kiipàcila kamwèpelè kasungùlùke, nkàà ne, kusùngila àba bàvwà Nzambi, kumpàlà kwa difùkà dya dyulu ne buloba, mumanyè ne nebàsungidiibwè. Ki mwàkambàYe. Ncyà bushuwa. Pa nanku wèwè udi. . . “Kî ng’ewu udi muswè, anyì ewu udi unyeema to; n'Nzambi udi uleeja luse.” Pòlo ngudi mwambè nanku. Muntu umwèumwè ewu.

⁸⁶ Mmwambè ne: “Ki bwa cinyi Nzambi ùvwa mwa kwamba, kumpàlà kwa Esawù anyì Yakòbò kulediibwabò, Wàkamba ne: ‘Ndi munangè umwe ne mukine mukwabo.’” Kumpàlà kwa mwànà ne mwànà kulediibwayè, Nzambi ùvwa mumanyè ne Esawù ùvwa mwenji wa maalu makònyàngàle, ne Ùvwa mumanyè ne Yakòbò ùvwa. . . ùvwa munangè bwanààbutè bwèndè. Pa nanku Yèyè ùvwa mumanyè, kumpàlà mene kwa dyulu ne buloba kwenjiibwabì, pa bwalu abu. Mpindyewu, netùjandulè mu katanci kakese emu ne Nganyi uvwa mucimanyè awu. Nshapità ewu ùdi ne dyandamuna adi.

Nzambi, . . . mu cikondo cya *kale ne mu mishindu mishùlèshùlàngàne wàkaakwila. . . ne baataatù kùdì bapòfètà,*

Mu matùkù a ndekeelu aa mmwakwile neetu ku Mwanèndè, . . .

Mwenzè cinyi? “Mwakwile neetu mu matùkù a ndekeelu aa ku Mwan’Èndè.”

⁸⁷ Mpindyewu, mmunyi munùdì dìbà adi bafwànyine kwela meeji, ne, mupròfètà ùvwa mwa kwikala cinyi? Tuvwakù bafwànyine dìbà adi kwikala ne mupròfètà mu ditùkù edi anyi?

Kakùyi mpatà to. Úvwakù Yèyè mufwànyine kwakwila kutùdì anyi? Cya bushuwa's. Kàdi ewu udi . . .Bapròfetà bàà ditùkù dya kale bàvwa Nyuma wa Yesu Kilisto.

⁸⁸ Mpindyewu, tùcyũmwàyi bìmpè mu cyòci, bwalu ncyèna ngeela meeji ne cidi cinùbwela bìmpè to. Mpindyewu, eci cidi anu bu Kàlaasà kàà Dyàlumingu, pa nanku tudi baswè kucitòòkesha. Nwamònu anyi?

⁸⁹ Mònaayi. Twàngatàayi Nyuma wa Nzambi uvwa mu Mòsà awu, anu menemene. . .ncimanyinu cidyanjididi cya Yesu Kilisto. Bantu bònsò bàà Dipungila Dikùlukulu bàvwa bimanyinu bidyanjididi bya nkùrusè. Mòsà, mulela mwànà mwakànyine, musokoka mu nkodì ya ku kaalà kwa màyi, muumusha kùdì baledi bèndè, ne bikwabo, ne mwikàle. . . Yèyè's ùvwa mfùmù, anyi mu—mulombodi, mufidi wa mikenji, mwakwidyanganyi. Cyònsò cìvwàye cìvwa cimanyinu cidyanjididi cya Kilisto.

⁹⁰ Tàngilàayi Yòzefù, munanga kùdì tatwèndè, mukìna kùdì bàna bààbò, ne musùmbisha ku tuubicyelè twà mfrangà tutwè ku makumi asatu. Mwimansha mu dijìmbà, bàcinka ne mmufwè; mupàtulamù. Mu dikèngeshiibwa dyèndè, mwedi wa maluvu wa mfùmù kusùngidiibwayè, mushebeyi wa ngombe kujìminayè; bìvi babidi bàà ku nkùrusè abu's. Ne pashìshe pààkapàtukàye, wàkapàtudiibwa mu dijìmbà adi, ne wàkatèekiibwa ku dyàbalumè dya Pàlò, bungèndààmùshingà butàmbe bunene. . . di—di—ditùngà dìvwà dicimùnè makwabo ònsò a pa buloba adi. Ne muntu nansha umwe kàvwa mwa kufika pàdì Pàlò kàyi mupicile kùdì Yòzefù to; Yesu musòmbe ku dyàbalumè dya Nzambi, ne muntu nansha umwe kàyi mwa kufika kùdì Nzambi kàyi mupicile kùdì Kilisto to. Ne pàvwà Yòzefù ùjuuka mu nkwasà wa butùmbi awu ne ùpàtuka, bantu bàvwa bàmudyànjidila, bènda bèla mbilà mikolè ne bèla mpungi, bèla mpungi, bamba ne: "Twàyi binwèè! Yòzefù nya' wiyee!"

⁹¹ Nenu pààlwà Yesu, mpungi neàdilè, ne cinù cyònsò necitwe panshi, ne ludimì lwònsò nelùjukulè. Eyowa's, mukalenge. S'ùvwa n'Yèyè.

⁹² Ne pààkafwà Yòzefù, wàkashìila aba bàvwà bindile disùngidiibwa abu civùlukilu.

⁹³ Mèmè ngàkatèeka cianza cyànyì pa mushèètè wà bafwè wà kale awu, anu abidi àdì panshi aa, wùvwa mwenza ne cyamù cya plomb. Ne bìvwa bimanya ne mubidi wèndè wàkashàala. . . mifùbà yèndè. . . Wàkamba ne: "Kanùnjiiki muneemu to, bwalu dīngà ditùkù, Nzambi neànùmwenèkèlè." Yèyè ùvwa mupròfetà. "Nzambi neànùmwenèkèlè." Ki yèyè ne: "Panwàya ku buloba bulaya, nwàngatàayi mifùbà yànyì."

⁹⁴ Mwena Ebèlù yònsò wa kale, ne nyimà mutuuta ne ùmata mashi, ùvwa mwa kutàpa dīsù mu mushèètè awu ne kwamba ne: "Dīngà ditùkù, netùpatukè."

95 Yesu mmushiye civùlukilu, lukità lwà munda mutupù. Dìngà ditùkù ditwàya ku lukità, ne bananga beetu, ne tuumvwà bèèla tuubimòtò twà buloba atu, pàmbàbò ne: “Butù ku butù, ne lupwishi ku lupwishi, ne buloba ku buloba” apu. Kàdi, mwanèètù, tudi mwa kutàpa dísù dyàmwàmwà dya mbù, ku lukità lwà munda mutupù. Dìngà ditùkù, netùùmukè mwab’ewu. Netwàlukilè Kumbèlu. Yèyè ùlwalwa. Byònsò bìkaavwa bileejìibwe mu bifwànyikijilu.

96 Tàngilàayi Davìdì, mubèngìibwe kùdì cisàmbà cyèndè sungasunga, muumusha mu nkwasu mu butùmbi kùdì cisàmbà cyèndè sungasunga. Pèndè mfùmù wa Yèlusàlèmà, wàkiiipaciibwa mu Yèlusàlèmà kùdì cisàmbà cyèndè sungasunga. Kàdi pàvwàye wènda ùbànda Mukùnà wà Olèvè, wàkatàngila paanyimà ne kwasayè mwadi. Ùvwa mubèngìibwe.

97 Bidimu nkàmà mwandamukùlù kuumukila apu, Mwànà wa Davìdì, Mfùmù wa Yèlusàlèmà, wàkasòmba pa kakùnà ne wàkaasa mwadi, bwalu Ùvwa mubèngìibwe.

98 Ùvwa n’Nyuma wa Kilisto munda mwa Davìdì. Byònsò abi bìvwa bidyànjlila kuleeja nkùrusè. Bapròfetà abu kale wàwa bààkaakula mu Dìnà Dyèndè. Bàvwa ne mwoyi mu Dìnà Dyèndè. Bààkenza maalu mu Dìnà Dyèndè. Bushuwa’s. “Nzambi mu bikondo bya kale ne mu mishindu mishiileshiiàngàne wàkaakwila ne baataatù kùdì bapròfetà, kàdi mu ditùkù dya ndekeelu edi ku Mwan’Èndè.”

99 Pa nanku bapròfetà ne bantu bàà nyumà, mu ditùkù edi, bàdi anu dileeja dya Kilisto cyanàànà. Kwàka, ku mikenji nkùvwàbo biimànyine, bàtàngila. Kùneeku mbiimàne, bàtàngila paanyimà mu mushindu mukwabo, bàtàngidila ku ngàsà.

100 Aci mu Ebèlù 11, nshapità wa ndekeelu awu, mèmè nkàadi mudyèlèlepù nkonko misangu yàbùngì. Mu nshapità wa ndekeelu, citùpà cya ndekeelu cya nshapità wa 11 wa Ebèlù, pàdiye wàkula bwa Abraham apu. Nshapità munene wa diitabuuja awu, kàdi ku ndekeelu aku, mmwambè ne: “Bàvwa bàlalakana bavwàle bisèbà bya mikooko ne bya mbièji, ne bààkabàshiyà byanza bitupù, ne bàbàkòsa bitùpà ne scie. Bàvwa bàlalakana, kabàyi ne mwaba wà kuya, bakìnyìibwe, ne badyombòdiibwe, ne bakèngèshiiibwe. Bwa bòbò, buloba ebu kì mbukùmbànyine bantu bàà mushindu awu to.”

101 Pashiishe Pòlò wìmana wàmba ne: “Kàdi twètù katùyikù bòbò kì mbapwàngàne nansha.” Bwalu bòbò bàvwa bàtàngila anu *ku* nkùrusè, kàdi twètù tudi tutàngidila *mu* nkùrusè. Twètù tudi ne Nyuma wa Kilisto pàànyimà pàà Mumanè kulwa mubidi wà buntu ne musòmbèle munkaci mwetu. Tudi tulwa mwab’ewu ku Nyuma Mwìmpè, udi kule ne kule ndongamu mutàmbe bwìmpè.

102 Ne mèmè mîngà misangu ntu ngaadikonka cìdì bwena Kilisto bwindile leelu. Bikèngela bwa muiishi udi ùbwela mu

cimenga ikalè. . . anyi ekeleeziya kampànda mupyamùpyà anyi mudimu kampànda mupyamùpyà, àdìbiìkilè mùdiye mupròfetà, ùya mwab'awu, wàmba ne: “Ee, bu bôbò mwa kumpèèsha mfrangà búngì kampànda. Bu mémè mwa kupeta kàshinyi kàà katàmbe bulenga. Bu bôbò mwa. . . Bu difutu dyànyì mwa kubàndishiibwa ngondo yisambombo yònsò.”

¹⁰³ Bikèngela twikalè ne cìdì citàmbe bulenga. Bikèngela twikalè ne nzùbù ya mitàmbe bulenga. Bikèngela twikalè ne bilàmbà bya bitàmbe bulenga. Citwènzà ncinyi patwimanà kumpàlà kwa biine bantu bàakalalakanà abu, bavwàle bisèbà bya mbùji ne bya mikooko, bàvwà kabàyi ne mwaba wà kutèeka mitù, bènda bàlalakana mu bipèèlà abu? Ne muntu kampànda udi mwa kutwèlulwila ne twètù tuumba tuumuka mu ekeleeziya ne katùyikù mwa kumwàlukila cyàkàbìdì to. Cìdì bwena Kilisto bùlòmba leelu ewu's. S'bvìwba bikèngela bwa twètù kudyùmvwà bundù.

Éyì Nzambi, ikàlàku neetu luse.

¹⁰⁴ Mu ditùkù adi, Yéyè wàkaakwila kùdì baprofetà, kàdì mu edi ditùkù nku Mwan'Èndè. Aci cìvwa ndíyì dya mupròfetà, kwòkù aku. Eci n'Díyì dya Mwànà, leelu ewu. Kaa, Dìnà dya Mukalenge òbèneshiibwè's wè!

¹⁰⁵ Mu ngaakwilù mukwabo, wèwè utàngila cindidimbi, ciibùlòjì, s'udi mufwànyine kutùpakana. Kàdì Eci's ncisukula, fòtò s'mmutòòke tòò. Cyàcya cìvwa nkùdì mupròfetà; eci nùku nku Mwan'Èndè. Cyàcya cìvwa nku ciibùlòjì; eci nku cintu ciine. Amen. Nudi nuciònà anyi? Kakwèna mpùngà wà kujìmijila nansha. Ncintu ciine, mu ditùkù edi nku Mwan'Èndè. Kaa, bilengapù's wè!

. . . *udiyè mutèèke mupyànyì* . . . (Kaa, ekèlekèle!) . . .
mupyànyì pa bintu byònsò, . . .

¹⁰⁶ Cìvwa ncinyi? Cìvwa nditèèkiibwa. Kaa, tèèlejààyi. Wàkatèèkiibwa, Kilisto awu's, mupyànyì wa bintu byònsò. Kaa, dyabùlù ùvwa mumanyè cyòcì aci, kacya anu ku budimi bwa Edènà, nudi numòna's, pàakumvwà dyabùlù Díyì adi ditùkù adi, mu dilumbulwisha dya bantu abu. Mwambè ne: “Bwalu udi mufùme ku lupwishi, ku lupwishi nkuwàlukilà; ne Dimiinu dya mukàjì nedizaazè mutù wà nyòka.” Dimiinu dilaya's.

¹⁰⁷ Sàtaanà ùvwa anu mwindile Dimiinu adi misangu yònsò. Pààkalediibwà Abèlè, kwambayè ne: “Bwalu bwàdikòsu, ki dimiinu adi ndyòdì adi.” Ki kushebeyayè Abèlè. Mwanèndè, Kaayinà, kushebeyayè Abèlè. Nenku Abèlè mmwenzè anu ùfwa, kwambayè ne: “Ngààpecì dimiinu adi.” Kudìshebeyayè. Kwambayè ne: “Ngàdìpecì.” Kàdì, lufù lwà Abèlè alu, dileediibwa dya Setè òvwa ndibìkà dya ku lufù cyàkàbìdì. Tàngilààyi nùmonè mwàkalwà ndelàngànyì ayi.

108 Ndelàngànyì ya Setè ayi, yàkalondangana, muntu mudipwekèshe, mwakàne; kulondanganayi too ne ku Henòkà; too ne ku Noà, too ne ku ndekeelu wa kabùtù kàà mvùlà ya Noà.

109 Tàngilàayi ndelàngànyì ya Kaayinà, balwè bantu bàà meeji matwè, balongè tùlaasà, maalu a mamanya. Bible kèna wàmbakù. . . Yesu kàakambakù, ne: “Bànà bàà pa buloba ebu mbatàmbe Bànà bàà Bukalenge lungènyi” anyi? Tàngilàayi luseke lwà Kaayinà nansha mene leelu ewu: beena meeji matwè, balongè tùlaasà, beena mpatà, batèndeledi bàà dipòko; nwamònu’s, batèndeledi bàà dikèma, kàdi beena maalu a mamanya, biibaki, bantu banene.

110 Angàtaayi bantu banene. Tàngilàayi Thomas Edison, bantu banene bàábúngì. Tàngilàayi Einstein, mitù ya meeji matwè ya pa buloba, bàà kudìna’s, leelu ewu, mitù ya meeji matwè ya pa buloba. Kàdi twètù katwèna tuteeta kukwàta mudimu ne mitù ya meeji matwè ayi to. Tudi tulekela Meeji àvwà munda mwa Kilisto awu ikalè munda mwetu, ne tutàngila ku Dìyì edi, ne tubiikila aci nanku.

111 Bangàngàbukà, nansha mutùdì tubèèla kààlumbandì ne byònsò bitùdì naabì, kàdi bàábúngì bàà kùdìbo mbeena mpatà, bantu bàdi bapangè kwitaba ne Nzambi ùdikù. Tàngilàayi bantu bàà meeji matwè ne bàà lungènyi leelu ewu. Bàdi ku lwòlò luseke alu, luseke lwa Kaayinà.

112 Kàdi tàngilàayi bàdi badìpwekèshe ne bàà bupòle. Ki dibiikà dyenu dya ku lufù cyàkàbìdì ndyòdì adi. Kaa, Dìna dya Mukalenge dibeneshiibwè’s wè! S’ki bwalu mbwabù. Mònaayi.

. . . yèyè wàkamuvwija *mupyànyi wa bintu byònsò, ku yèyè kabidi nkwaàkafùkilàye buloba;*

Wàkafùka buloba nganyi? Kilisto. “Kilisto ngwàkafùka buloba anyi?” Eyowa’s, mukalenge. Tùyaayibì anu kumpàla ndambù.

Yèyè udi mwikàle mu dibàlakana dya butùmbì bwèndè, ne cimfwànyì pyòpyopyò cya bwikadi bwèndè, . . .

Dibàlakana dya butùmbì bwa Nganyi? Butùmbì bwa Nzambi. Cimfwànyì pyòpyopyò cya Bwikadi bwa Nganyi? Bwa Nzambi. Kaa, ndi munangè eci!

. . . anyi *cimfwànyì pyòpyopyò cya buupersona bwèndè, ne mwimànyike bintu byònsò ku dìyì. . .*

S’ki bwalu mbwabù. Dìyì, didì diimànyike bintu byònsò. Yesu mmwambè, mu Maataayi 24 ne: “Maulu ne buloba nebijiminè, kàdi Mèyì Àanyi kàakujimina nansha.” Yèyè ngudi wimànyika bintu byònsò.

113 Maalu a mamanya àteeta kuCipwekesha milongo, àmba ne: “M’Mukàndà wà kale. Mmukùdimuna.”

114 Nansha ekeleeziya wa Katolike wa Loomò mwine, Mwepiskopo Sheen wàkamba ne: “Ùtu mukùdimùnyìbwe misangu yinaayi anyì yitaanu mishìilàngàne, kàdi Kéna anu ne bwa nsongo to. Kwéna mufwànyìne kwikala ne mwoyi ku Yéyè byòbì bikèngela nanku to.” Kàdi Yéyè ùdi wìmanyika bintu byònsò ku Díyì Dyèndè. Amen. Ki meeji àndi ngeela bwàDì. Ndi mèmè ngiitabuuja Bible.

. . . *dìyì dya bukolè bwèndè*, (kùdi bukolè mu Díyì),
pàvwàye yéyè mwine mukezùle mpekaatu yetu, . . .
 (tàngilàayi kùneeku) . . . wàkasòmba *ku dyàbalùme dya Mutàmbe bunene wa mu Dyulu*;

115 Cìdì Pòlò ùteeta kwenza ncinyi? Ùdi ùteeta bwa kuleeja ne Nzambi ùvwa mudipàngàdikile bintu byònsò mu Kilisto, ne Kilisto ùvwa cimfwànyì pyòpyopyò cya Nzambi. Citùpà cyònsò cìdì cishààle cya nshapità cìdì citàngila mùvwàYe kuulu mutàmbe Banjelo, kuulu mutàmbe makolè ònsò. Banjelo bàvwa baMukuukwila. Pòlò ùvwa ùteeta bwa kuMuzànjika.

116 Mpindyewu, ndi muswe kuteeta. . . Mèmè ncìyi muye kumpàla kupita pa eci, cìdì cishààle cìdì anu cizànjika Kilisto. Cìdì Pòlò wàmba kaaba aka, bu mu nshapità wa 11, ne byònsò pàdiye wàmba bwa buloba. Mmwambè ne: “M’Mwanjelo kaayi—kaayi wàkambilàYekù ne: ‘Wèwè udi Mwan’Àanyi, leelu ewu NgààKuledi?’” Nwamònu anyi?

117 “Nshìikidilu wa buloba, bôbò’s nebùbutukè. Buloba nebùbutukè. Kàdi. . . Ne bintu byònsò bya pa buloba nebùbutukè. Yéyè ùvwa mwa kubìvunga bu cinkutu. Bìvwa mwa kwikala bikùlákàje, ne bikùdimùke, ne biyè. ‘Kàdi Wèwè ùdi ushààla. Udi Wèwè ushààla kashidi. Wèwè udi Mwan’Àanyi. Leelu ewu Mèmè ngààKuledi, ne kwàkubùtukakù to, musòmbè ku dyàbalùme dya Mutàmbe bunene.’”

Dyàbalùme mbwena kwamba cinyi? Kì nnè, Nzambi ùtu ne cyanza cya dyàbalùme kùdi muntu kampànda musòmbè to. *Dyàbalùme* mbwena kwamba ne “bukolè ne bukòokeshi,” ùdi ne bukòokeshi bwa bintu byònsò mu Dyulu ne pa buloba. Ne Maulu ònsò ne buloba mbifùkiibwe kùdiYe.

118 Mpindyewu, Mwabìlaayi munene ewu Nganyi, Muntu munene, Kilisto ewu? Mònaayi, Nzambi mu Taatù, Mwànà, ne Nyuma Mwìmpè, kì nnè. . . Mbùsàtù, kàdi kì mbùsàtù bwa bantu nansha. Mbùsàtù bwa mudimu, bwa Nzambi umwe.

119 Yéyè ùvwa Taatù mwikàle ùlombola bàna bà Izaleela. Aci cìvwa mmudimu Wèndè, Yehowah Taatù munene awu. Ne Wàkasòmbela pa buloba, ùbìikidiibwa ne m’Mwànà. Kàdi mpindyewu m’Musòmbòle mu Ekeleeziya Wèndè, ùbìikidiibwa ne n’Nyuma Mwìmpè. Kaciyi Nzambi yisatu to; Nzambi umwe mu mudimu yisatu: Taatù, Mwànà, ne Nyuma Mwìmpè.

Bantu bàdi bàteeta bwa kuMuvwija Nzambi yisatu mishìilàngàne, Nzambi Taatù. Ki bwa cinyi, beena Yudà, wèwè

kwènàku mufwànyine, kwàdyàkufikishakù eci kùdi mwena Yuda nansha, to, aci nanku. Kèna mwa kuciitabakù to. Ùdi yèyè ne mukenji, wà ne: “Mémè ndi Nzambi Umwèpelè.” Kùdi Nzambi anu umwèpelè.

¹²⁰ Mu Afrike bàtu bàbàtiizangana mishindu yisatu mishiilàngàne: bàtu bàbàtiiza musangu wùmwe bwa Taatù, musangu wùmwe bwa Mwànà, ne musangu wùmwe bwa Nyuma Mwimpè. Mission ya Foi Apostolique, bôbò bàtu bàbàtiiza misangu yisatu, cyâdi panshi, bwa lufù Lwèndè. Cidìbo bàbàtikila ne ng’Evanjeeliyo mu Kaabujimà ku Côte Ouest aci, anyi ku Côte Est, bàbàtiiza misangu yisatu cyâdi muulu, bamba ne Yèyè... bwa dijiikiibwa Dyèndè.

Ne wàmba ne: “PàakafwàYe, Wàkiinyika mpalà panshi.”

¹²¹ Mukwabo wàmba ne: “Anji indila. S’bitu bikèngela kujiika muntu cyâdi muulu.” Tuntu anu tukese cyanàanà twa dimanya’s, pàdìbi ne, bubidi bwabo bàdi mu ntùpàkànyi; bònso babidi mu ntùpàkànyi, bilondèshile Mifundu.

Eci ki Ulimà-Tuumimà. Yèyè ngudi ukòsa bwalu.

¹²² Mpindyewu, mwab’ewu, twànjàayi anu kucyàngata mu cimfwànyi bwa tùmònè ní cidi cipàtuka bishi—bishi, dilòòlò edi. S’ncyôci eci, panwikalà baswè kucimòna. Munda mwa bidimu byònsò bitwè ku makumi abidi ne bitaanu bìndi mwambi ebi, ntu mulongèlonge cyôci aci. Ne nkàadi mudyèlèele nkonko pa mapà mu ekeleeziya. Mapà awu ncinyi? Cipròfetà, dyakula dya mu myakulu, dyandamuna dya myakulu, dibuulula dya kùdi Nzambi, ne bikwabo abi, byònsò abi bidi bivwila anu kùdi Kilisto.

¹²³ Mpindyewu tàngilàayi. Kilisto ki Mutù wà bintu byònsò. Ne Yèyè ùdi Mutù wà Ekeleeziya. Kàdi nukàadikù bamòne dibwe dinene dya mbongò anyi? Dibwe dinene dya mbongò didi disonga bìmpè adi, didi ne tupese tukese tùdi tùmukàku, tükòsekakù. Aci cidi cyènza mbongò mujaalàme. Tupese atu ntwà mudimu kaayi? Mbongò mulelèlè, mushindu wùdiye upàtuka, mmuzaajìbwe; mbongò mulelèlè, pàdìbo bamupeta.

Mvwa mu Kimberley. Nwènù, bààbúngi bàà kunùdi, bàkaadi bumvùmvwe ne udi mwa kwangula mabwe a mbongò mu njila abu, ncyà bushuwa. Mémè ne Billy, ne Mukalenge Bosworth. Mfumu wa mines ya mbongò ya Kimberley, wàngata... Úvwa wisiyè wanyi mu disangisha kuntwaku. Ki kuyabò neetu kuntwaku. Ne anu pambèlù pàà... Bàdi bàumbula, kaa, mu mètres mapite pa nkàmà yitaanu mwinshì mwa buloba. Àdi àpàtukamù, dibwe dya bleu, dya bleu dinene, mùdi dya bleu dinùtu nupeta apa edi. Kàdi beena kalaba abu, bàvwa bàbàtùma mu mètres mapite pa nkàmà yitaanu mwinshì mwa buloba amu, bwa kuumbula, bwa kulama mushinga mubànde. Udi mufwànyine kuya ku musulù aku, bàdi bàkùluma mu ntàntà wa nkàmà ya kilomèètà. Angàtà mbekeci yibidi ya

litres makumi anaayi, mwakambàye, kàdi ùyàmbùlè, myùle tètè ne—ne mùcyangà, wèwè ní udi mufwànyine kuyifikisha kumbèlu, s'udi mufwànyine kushààla mwena miliyô ya ndola, mmufwànyine kwikalàmù ne mbongò búngì kabùyi kwamba. Kàdi bikèngela bwa kukwàtabò mudimu bwa kuumbula, bwa kulamabò mushinga wàwù mukolesha.

¹²⁴ Mpindyewu, mbongò awu, pàdiye ùpàtuka, ùdi anu mùdi cipese cinènè cya lumwènù, cifinùnùke, civungàmàne, bu nanku awu. Kùdi mbongò wa bleu, mbongò mufiike, wa éméraude, ne mbongò wa máyi munda, ne mbongò mutòòke. Kàdi pàdiye ùpàtuka...Dìbà adi pàdiyo bàmusonga ne bàkwàta nendè mudimu, kùdi citùpà cidi mbongò awu ne cya kujimija. Ne ùdi ne cya kujimija tu—tupwishipwishi twèndè atu. Bàdi bùùmusha tupwishipwishi atu, bwalu, pàditu tufika mu bukènkè bwa buludi, nùnkù ewu, tùdi túbàlakana. Tupwishipwishi atu, cidi cyènza ne túbàlakanè, mmushindu wùdi mbongò musongìbwe. Mmusongìbwe, mukòshìbwe nseke, ne pashìishe, ùdi ùbàlakana. Ne umwè neàfilè bukènkè bwa máyi a matàmbà, mukwabo neàfilè bukènkè bwa bleu, ne pàmwàpa bukwabo, bukènkè bwa éméraude, ne bukènkè bukúnze. Nènkù makènkè mashiilèshìilàngàne àdi àpàtukamù, menzè bu meekala a mwanzankòngòlò. Bàtù bàcibìikila ne, “kadilu kàà mbongò.”

¹²⁵ Mpindyewu, bwònsò bwa ku makènkè awu bùdi bùleeja mapà. Kàdi, cidi anu ne, Kilisto ki Mbongò awu. Ne Yèyè ki Ewu Wàkalwa, ne wàkazaajiibwa, ne kutàpiibwa mpùtà, ne kusongiibwa, bwa Wàmòna mwa kuDìleeja bu Bukènkè kùdi bàà pa buloba. Yèyè ki Mbongò Munene awu.

¹²⁶ Nudikù mwa kudifwànyikijila, kumpalà mene kwà kwikalakù buloba, kumpalà kwà kwikalakù bukènkè, kumpalà kwà kwikalakù mutooto, kumpalà kwa kwikalakù ní ncinyi ní ncinyi? Kùdi Mpokolo munene ùfùkuka, wà Nyuma, ne mu mwine Mpokolo ewu kupàtukaku dinanga dya ditàmbe kukezuka, bwalu kakùvwa cintu nansha cimwè civwàku mwa kupàtukamù to anu dinanga. Mpindyewu, twètù, citùdi twètù tubiikila ne ndinanga aci, leelu ewu, ndinanga dinyangakaja. Kàdi patùdi anu ne twàpeci katùpà kasungùlùke, kandambù kakesèè kàà dinanga adi munda mwetu, s'cidi cishintulula mmwènenu wetu yònsò nkòng.

¹²⁷ Pashìishe mwòmù amu mùdi mùpàtuka kasulù kakwabo, mu Mpokolo munene, Mbongò ewu, ne civwa cibìikidiibwa ne mbwakàne, bwakàne anu bwetu bwa pa bòbò ebu. Mpindyewu, ki bwa cinyi byàkakèngela bwa twètù kwikalà ne mikenji. Ki bwa cinyi bikèngela mikenji kwikalayi ne dilumbulwisha. Dilumbulwisha dyòdi kadìyi dilwa paanyimà pàà mikenji to, mikenji kayèèna ne dikwàcisha nansha. Ne dilumbulwisha pàakafidiibwàdi kùdi mikenji, cidi citwàla lufù aci, ne kakwèna muntu nansha umwe udi mufwànyine kufuta cibawu to anu

Nzambi Yêyè mwine. Nenku Yêyè ngwâkafuta cibawu cya lufù lwetu, ne kwangata mpekaatu yetu pambidi Pèndè, bwa twamònakù mwa kwikadila bwakànè bwa Nzambi ku Yêyè.

¹²⁸ Mpindyewu, Makênkè manene aa pààkapàtukàwu, anyi nsèsà minene ya Nyuma ayi: dinanga, ditalala, ki cyònsò cìvwàku, Aci. Kakùvwakù disaamà to. Kakùvwakù lu—lùkinù to, anyi budimù; abi kabìvwakù mwa kufùmina mu Mpokolo ewu to. Awu ùvwa n'Yehowah. Ùvwa n'Yehowah Nzambi. Nenku mpindyewu, anu mùdi beena tèòlòjì bàcibiikila, tèòfàní wàkapàtuka mu Cyòci aci awu, uvwa ubiikidiibwa, mu Mifùndu ne, “Logos,” Logos wàkapàtuka mu Nzambi awu. Ncikolè bwa kucyùmvwija, kàdi Cìvwa citùpà cya Nzambi.

¹²⁹ Mpindyewu, cyàkenzekà ncyòci eci. Kaa! Mfwilaayikù luse. Ndi—ndi—ndi anu mfika pa cyòci eci cyanààna, eci ncidi cìkamfikishà buludì ku mushindu wà ncinanga. Nwamònu anyi? Logos, ne Mpokolo munene ewu, Mpokolo munene wa Nyuma uvwa kàyi ntwàdijilu anyi kàyi ndekeelu ewu; Nyuma munene ewu wàkabanga kudivùnga, mu bufùki, ne Logos wàkapàtukaMù awu ùvwa m'Mwànà wa Nzambi. Ki mbùngakeenu umwèpelè uvwa nendè Nyuma. Ne Ùvwa ntèòfàní, udi umvwija ne mmubidi kampànda, ne mubidi awu wùvwa mufwànàngàne ne muntu.

¹³⁰ Mòsà wàkaWùmòna pààkapìcilàYe pa...pabwìpì ne—pabwìpì ne lubwebwe. Ki kuWùtàngilayè, kwambayè ne: “Wùvwa mufwànàngàne ne citùpà cya nyimà wa muntu.”

Mmubidi wà mushindu wumwewumwe awu wutùdi tupeta patùfwafwà pànwapa. “Ntentà wa pa buloba ewu yêyè munyangùke, tukàadi ne mukwabo mwindile.” Wùvwa ng'Wòwù awu. Ne ki tèòfàní uvwa Mwànà wa Nzambi awu. Mwànà awu, Logos awu, wàkalwa musunya, bwalu twàkatèekiibwa mu musunya. Nenku tèòfàní awu, Logos awu, wàkalwa musunya, pànwapa munkaci mwetu, ne Kàvwa cingà cintu to anu mwaba wà cisòmbedi cyanààna, bwalu Mpokolo awu mu kaabujimà wàkasòmbela munda Mwèndè. Kaa, nudi nucimòna anyi? Ki Wòwò awu. Ki cìvwà Wòwò awu, wùvwa, mu . . .

¹³¹ Tàngilàayi kùnèèku. Tùbuululààyaaku lùkàsà mu Ebèlù, nshapità wa 7, anu bwa katanci kakese cyanààna kàà—kàà ngàsà, bu Nzambi mwa kwanyisha. Tùmònààyibi ne cidi cimwèka bishi kaaba aka. Abraham!

Tudi ne dîbà bùngì kaayi? Tudi ne tusunsa dikumi. Eyo. Tudi tubàkula eci, pashiishe tucijikija musangu wàlondà, wàlondà, anyi mu dyàlumingu, bu Mukalenge mwa kwanyisha.

¹³² Abraham ùvwa wàlukila ùfùmina ku dishebeya dya mfùmù awu.

Bwalu Melekisedekè ewu, mfùmù wa Salèma, . . .

Mbanganyi bàdi bamanyè ne Salèmà awu ùvwa penyì, ùvwa nganyi, ùvwa cinyi? Yelusàlèmà.

...mfùmù wa Salèmà, mùlòpò wà Nzambi mutàmbe bunene wa mu dyulu, wàkatwilangana ne Abraham pàvwàye wàlukila ùfùmina ku dishebeya dya bamfùmù, ne kumubèneshayè;

Tèelejààyi.

Uvwa kabidi Abranham mupèeshe cyàdiikùmì cya byònsò; dyàmbedi mwikàle ku dyumvwija ne Mfùmù wa bwakàne, . . . paanyimà pàà aci kabidi ne Mfùmù wa Salèmà, mbwena kwamba ne, ne Mfùmù wa ditalala;

Kàyi taatù, kàyi maamù, kàyi bankambwà, kàyi nì nnè ntwàdijilu wa matùkù, anyi ndekeelu wa mwoyi; . . .

133 Mfùmù mupwekè ùfùmina mu Salèmà, ne kutwilangana ne Abraham pàvwàye ùfùmina ku dishebeya dya bamfùmù. Nenku Mfùmù awu kàvwa ne taatù, kàvwa ne maamù, kàvwa ne ntwàdijilu wa matùkù anyi ndekeelu wa mwoyi to. Nganyi uvwa Abraham mutwilàngane nendè awu? Elàayi meeji mpindyewu. Kàyi taatù to; Kàyi maanù. Kacya Kàvwakù ne cikondo cya ne Wàkabanga, ne Kènàku ne cikondo cya ne neÀfikè ku ndekeelu to, pa nanku Mfùmù umwèumwè wa Salèmà awu's ùdi ne cya kwikala ne mwoyi leelu ewu. Amen. Nudi nucimòna anyi? Ùvwa n'tèòfànì uvwa Mwànà wa Nzambi awu awu. N'Salèmà kaayi awu? Yelusàlèmà udi mu Dyulu awu, uvwa Abraham, mwikàle mubèneshiibwe, wènda ùkèba, bwa kupeta, ùteeta bwa kupeta Cimenga cìvwà Mwenji ne Mwibaki mwikàle Nzambi. Ùvwa wènda ùlalakana muvwàle bisèbà bya mikooko ne bya mbùji, myaba yònsò, mushiya byanza bitupù, wènda ùlalakana, ne wènda ùkèba Cimenga cìvwà Mwenji ne Mwibaki mwikàle Nzambi. Ki kutwilanganayè ne Mfùmù wa Salèmà awu, wènda ùpweka, ki kuMufutayè cyàdiikùmì cya byònsò bìvwàye mukapàwùle abi. Amen. Ki Yèyè awu. Kaa, Mwanètètù Graham, ùvwa n'Yèyè awu. Ùvwa n'Yèyè awu.

Abraham wàkaMumòna cyàkàbìdi. Dìngà ditùkù ùvwa musòmbe mu nntà. Dya ùtàngila anyi, kwàka kùvwa kùlwa, kumònayè bantu balùme basatu bènda bálwa.

134 Nudi bamanyè's, kùdi anu cintu kampàndà kùdi mwena Kilsto, cidì cyènza ne yèyè mmumanyè Nyuma pàdiye ùMumòna. Pàdiye . . .Yèyè ùdi anu ùcimanya. Kùdi anu cintu kampàndà cya Nyuma pa bwalu abu. Bintu bya Nyuma bitu bìjinguludiibwa mu Nyuma. Wèwè udi umanya. Eyowa, yèyè ùdi anu mwa kucimanya, piikalàye mulediibwe cya bushuwa. "Mikooko Yànyì mmimanyè Dìyì Dyànyì."

135 Nenku yèyè wàkamanya anu ne kùvwa cintu kampànda. Kupàtukayè lubilu kwambayè ne: "Bwelà, Mukalenge wanyì. Sòmbelà panshì. Indilà kakese. Nèngàngatèku cipese cya dyàmpà ncitèekè mu cyanza Cyebe amu. NènKwowèshèku máyi

ku makàsà. Anji ikishàku, pashiishe ùtungunukè ne lwendu Lwebe, bwalu Udi—Udi mulwè kummwènekela.” Mu buloba bwatùke mwàmwa, mulondè njila wa bwalu bukolè, wa dyendela pàmwè ne banyaàbanya badyombola bàà Mukalenge.

Pàvwàbi ne, Lotà ùvwa musòmbèle mu mabanji, mwànà wa mwanààbò awu kuntu kwàka, kàdi ùvwa musòmbe mu mpekaatu. Ki cidi mabanji àbúngì àtwàla’s mmpekaatu.

136 Pa nanku Abraham kuBàseemejayè, pàvwàye wàngata ndambu wa màyi ne ùBòweshawù ku makàsà apu. Kupàtukayè lubilu e kubwela mùvwà twànà twa ngombe amu, kwangatayè kànà kàà ngombe kàà maanyi mu cisumbù cya ngombe amu, ne kukàshebeyayè; kukàfilayè kùdi musadidi, bwa kukàlongolola. Kwambayè ne: “Sarah, vundàkàjà bukula bwebe abu.”

S’nudi bamanyè kuvundakaja’s, cidiku, cidici cyùmvwija. Nudi bamanyè’s, mààmù kale wàwa ùvwa ne cintu cya kale, cyenzè bu mupànji, cìvwàye naaci mu ci—cipànza cya bukula. Nukàadikù bamòne cimwè cya ku byòbi abi pàmwè ne kasengulu anyi? Nenku udi ne mupànji muntwamu, ukoono bukula, udi mumanyè’s; nenku bìlwa bujitu nùku *ewu*, ne ubikoono byònsò, bu nanku awu. Nkààvwakù mumònemòne maman ùcyènza, misangu yàbúngì, mupànji awu, mwikàle ne kaacintu kavùngàmàne ne kanshinga kakese kaswikilakù. Ùvwa wèlamù bukula abu ne ùbùsenga nùku *ewu*, nudi bamanyè’s, ne ùpicishamù cyanza ùtùma kumpàla ùtùma paanyima, nùku *ewu*. Pashiishe wàngata mupànji ne ùvundakaja, nùku *ewu*, bwa kubùpwekesha bwònsò. Piine apu mpàdibi bikèngela bwa kupweka kuya kapelesha bukula bwetu abu ku cyamù cya kale cya bukula; ne nsèka ya minene ayi, nudi bamanyè’s, ya bujitu ayi, twenza dyàmpà dilenga dya bukula bwa nsèka. Udi mufwànyine kukòsa mici ditùkù dijimà, ne dikàndà dya dyòdi adi.

137 Ki pashiishe, yèyè ne: “Vundàkàjà bukula, lùkàsàlùkàsà. Ne enza tûtò twoshila pa lukàsù pa difùwà apa mene, lùkàsàlùkàsà.” Ki kukàmabò ngombe mabèèle ne kupetabò mabèèle. Ki kuàngatabò, kuàvwàndululabò, kwenzabò màntekà. Ki kuyabò kashebeya kànà kàà ngombe aku ne kupetabò munyìinyi, ne kukàlangabò munyìinyi awu. Kwangatabò màntekà a mabèèle, dyàmpà dya bukula bwa nsèka, ne kwangatabò màntekà ne kuàlaababò pa tûtò twa mudilu twoshila pa lukàsù atu. Kaa, mbìmpè bya dikèma. Ki kubìmetekabò byònsò pòpò. Ki kupàtukayè naabi, ne kubitèekelayè Bantu basatu aba.

138 Nenku pàvwàBo bàdya apu, Bàvwa anu kacya bòòsha dísu lwà ku Sodomà. Nenku paanyimà pàà mutanci, kujuukaBò e kwasaBò lwendu. Ki Yèyè kwamba ne: “Abraham. . .” Yèyè ne: “Kwàkucinsokokakù to.”

139 “Ncyêna mwa kukusokoka cîNdi muswè kwenza nansha. Nyààya kuntu kwàka. Mpekaatu ya Sodomà mmifikè ku maci Àanyi.”

Muntu awu ùwva Nganyi? Ne lupwishi ku bilàmbà Byèndè kwònsò, ne musòmbè mwaba awu ùdya munyìnyì wa kànà kàà ngombe, ne ùnwa mabèlèlè a ngombe, ne ùdya dyàmpà dya bukula bwa nsèka dyoshila pa lukàsu, dilaaba màntekà. Mwabilaayi wa pabwèndè ewu Nganyi? Babidi, anyi Basatu, basòmbè mwaba awu. Ne lupwishi ku bilàmbà Byèndè kwònsò. Kaa, eyowa’s: “Tudi bàà ku Ditùngà dya kule.” Eyowa’s, kule kwa dikèma. Ki pa nanku kwambaYè ne. . . Ee, Bòbò abu bàwva Banganyi?

140 KwambaYè ne: “Ncyêna mwa kusokoka Abraham to, bu mùdiye mupyànyi wa buloba.” Amen. “Ntu nsokolwela minsokòntù Yànyi,” mu ngaakwilù mukwabo, “aba bàdi bapyànyi bàà buloba.” S’kì mwaba wùvwàbi bikèngela bwa Ekeleeziya kwikalaYe leelu ewu awu. Ncya bushuwa’s. Petà Minsokòntù ya Nzambi, manyà mwa kudìpòpa, ne mwa kwenza maalu, ne cidi cikèngelà kwenza, ne mwa kwenda, ne mwa kwikala ne mwoyi. Tudi bapyànyi bàà buloba. Cya bushuwa. Yèyè ùdi ùkusokolwelaCì, bwalu Yèyè kààkusokoka kantu to. Ki bwa cinyi tudì tumòna bintu ebi byènzeka.

Bàà pa buloba bàdi bàmba ne: “Aa, adi’s ndikolesha dya maalu anu pa dyòdi’s.” Bàlekèlaayi bàcyàmbè. Mupyànyi wa buloba yèyè mmumanyè maalu aa. [Katùpà kàà mukàbà wà mèyì munda mutupù—Muf.]

. . . *bwalu bòbò nebàbükìdiibwè ne mbàna bàà Nzambi.*

Disànka ndya aba bàdi bapòle; bwalu bòbò nebàpyanè buloba.

Yèyè ùdi ùbàmanyisha minsokòntù Yèndè, ùbàsokolwelayì, ùbàleeja cidi cikèngelà kwenza ne mwa kwikala ne mwoyi, kulekela bintu bya pa buloba; kwenda mu difwànà dya Nzambi ne kwikala ne mwoyi mu difwànà dya Nzambi, mu cikondo cya mpindyewu eci, kwikala kwenda Nèndè. Bàà pa buloba bàmbè cidìbo baswè kwamba aci.

141 Ki kwambaYè ne: “Ncyêna mwa kusokoka Abraham mùnsokòntù ewu to, bwalu, bu mudibi ne yèyè ki mupyànyi wa buloba. Kàdi,” mwakambàYè, “Nyààya bwa kabùtula Sodomà. Nyààyakù.”

142 “Cyùdi muswe kwenza ncinyi, Mukalenge? Udi ufùma penyi? Byònsò abi bìdi bìshi?”

143 Kufikaye ku dijandula ne, Yèyè wàkamba ne: “Ne cikwabo cintu kabidi, Abraham, wèwè windìdì bidimu makumi abidi ne bitaanu bwa mulayi wùndì Mèmè mukupèeshe ewu. Ukàadi mupetè tunshèsheetè twònsò twà mwànà, ne—ne mpengèle ne byònsò, bwa mwine mwàna awu, kùkaadi bidimu makumi abidi

ne bitaanu. Uçidi anu kacya wângindila Mémè. Mpindyewu Nénkumwènèkèlè, anu lwà pa cikondo cya mwoyi menemene, bilondèshile, cikondo cya mwoyi, ngondo udi ulonda ewu Mémè nêngiikalè neebe.”

144 Kàdi Sarah, paanyimà apu mu ntentà. Ne Muntu ewu uvwa ne nyimà mwela ku ntentà aku, mwikàlè wàkula ne Abraham, nùnkù ewu. Ki Sarah kwenzayè ne: “Huh!”

145 KwambaYè ne: “Cyàfikishì Sarah ku diseke ncinyi?” Akà-akà-akà! Bishi bwa aci? Aci’s civwa anu lubùkù pa lwòlò, kî mmwômò anyi? “Cyàfikishì Sarah ku diseke ncinyi?”

Sarah ne: “Bwàlà, ncyèna musekèku to bwalà bwànyì.”

146 Awu ne: “Kaa, eyowa’s, s’wàseki.” Ûvwa mumvwè bwòwà. Ûvwa ùzakala. Ûvwa Nganyì awu, uvwa mwa kumanya civwàye wènzà pàanyimà mu ntentà amu awu? S’n’Yèyè Nzambi umwèumwè udi neetu leelu ewu awu. Umwèumwè Awu. Mmumanyè byònsò pa bwalu abu. Nwamònu anyi? Ûdi ùbìsokolola anu mùdi dijinga dyebe. Nwamònu anyi?

147 “Udi useka cinyi?” Nwamònu’s, ne nyimà Wendè mwelakù. Bible mmwambe nanku, ne: “Nyimà Wendè ùvwa mwela ku ntentà.” Kàdi, Yèyè’s wàkacimanya. “Yèyè, paanyimà apa, ùdi wènzà *cikampàndà* bwa cinyi? Udi umòna anyi?” Pa nanku, Yèyè kwamba ne: “Nénkumwènèkèlè.”

148 Mwabilaayi wa pabwèndè ewu Nganyì? Nudi bamanyè cyàkenzekà anyi? Wàkapàtuka buludi mwaba awu e kujìmina. Ne Bible mmwambè ne Ûvwa n’Nzambi wa Bukolè bwònsò, Yehowah, Mpokolo munene awu, Tèòfànì awu, Logos awu.

149 Muiishi kampàndà wàkangambila, kwènji cikondo, wàmba ne: “Mwanèètù Branham, ncyà bushuwa ne kwènà mufwànyine kwela meeji ne ùvwa n’Nzambi to, mmwômò anyi?”

150 Mémè ne: “Bible’s mmwambè ne Ûvwa n’Nzambi, Elohim.” Byòbì biine, Yèyè’s ùvwa Nzambi wa Bukolè bwònsò, El-Shaddaì awu, ncyà bushuwa, Mufidi wa Makàndà, Musànkishanganyi awu. Amen.

151 Kaa, s’ngǔmvù bwena Nzambi bwàmbwedi kwòkù! Elààyìbì meeji. Ki, s’n’Yèyè. Mpindyewu nènnùleejè ne Yèyè n’Nganyì kaaba aka, dîbà adi nenùmonè ne Mwànà n’Nganyì. Ûvwa n’Yesu, kumpàlà kwa kwikalaYè ne Dìnà dya buntu ne, “Yesu” adi.

152 Mwimàne mwab’awu, ku ciinà cya màyi ditùkù adi. Ne bònsò bàvwa bànwà, nudi bamanyè’s, ne: “Bàvwa ne màyi àvwà mu cipèèla amu,” ne bintu bya mushindu awu. Yèyè kwamba... Bàvwa bàdya manà ne bikwabo. Kwambabò ne: “Baatatwètù’s bàakadyà manà mu cipèèlè, munda mwa bidimu makumi anaayi.”

153 Yèyè ne: “Kàdi bôbò abu, muntu ne muntu, s’mbafwè.” Yèyè ne: “Mémè ki Dyâmpà dya Mwoyi òdi difume kùdi Nzambi, mu Dyulu. Ewu udi udyà Dyâmpà edi kààdyàkufwàku to.”

154 Bôbò ne: “Ee, baatatwètù’s bààkanwà ku Nyuma awu, ku Lubwebwe lwà nyuma lùvwà mu cipèèlà, lùvwà lwènda lùbàlonda alu.”

155 Yèyè ne: “Mémè’s ki lwòlò Lubwebwe alu.” Butùmbi’s wè! Yone Munsantu, nshapità mwi6.

“Mòna’s,” mwàkambàbo, “cinyi?”

“Eyowa’s. S’ncyà bushuwa.”

156 “Mòna’s,” awu ne, “Wèwè udi . . . Kwèna nansha ne bidimu makumi ataanu to.” Mu bushuwa bwa bwalu, mudimu Wèndè wàkenza ne Yèyè àmweneke mukùlumpè ndambù, kàdi Pèndè anu ne bidimu anu makumi asatu cyanàànà. Bôbò ne: “Kwèna nansha muntu wa bidimu bipite pa makumi ataanu to, kàdi wamba mùdi mumòne Abraham, yèyè ukàadi mufwè kùkaadi bidimu nkàmà mwandamukùlù anyi nkàmà citeema awu? Bwa mpindyewu kaayi twàmanyi ne wèwè udi démon.”

157 Yèyè ne: “Kumpàlà kwa Abraham kwikalakù, NDI.” S’ki Yèyè awu. NDI awu ùvwa Nganyi? Dinà dya ku musangu ne ku musangu bwa lukòngò ne lukòngò lwònsò. Úvwa . . . Dikunji dya Kapyà mu kaacipuka kàvwa kàlàkuka kapyà adi ne: “NDI EWU ÛNDÌ.” S’ki Yèyè awu, Tèòfàní wàkenza Yè pànwapa ewu, ubiikidiibwa ne m’Mwànà wa Nzambi, NDI awu, Yehowah awu.

158 Tomààsè wàkamba ne: “Mukalenge, tùleejè Taatù nenku aci necitùsànkishè.”

159 Yèyè ne: “Ndi neenu ntàntà buleyi nùnkù, wèwè kùyi uMmanya?” Yèyè ne: “Paùdi uMmòna Mémè, udi umòna Taatù. Bwa cinyi kwamba ne: “Tùleejè, Wèwè, Taatù”? Mémè ne Taatù tudi Umwe. Taatù Wanyì mmusòmbèle munda Mwànyì. Mémè ndi anu ntentà cyanàànà wa ubiikidiibwa ne m’Mwànà. Taatù mmusòmbèle munda Mwànyì. Kí m’Mémè udi wenza byenzedi to, n’Taatù Wanyì udi musòmbèle munda Mwànyì. Yèyè ngudi wenza byenzedi, kí m’Mémè to.”

160 Mpindyewu, mwimàne mwaba awu, cyàkàbidì, Mòsà wàkaMumòna, citùpà Cyèndè cya nyimà, kwambayè ne: “Cìvwa ne mmwènekèlu wa nyimà wa muntu,” Logos uvwa mupàtùke mu Nzambi awu.

161 Dìbà adi cìvwa cyenzèke ncinyi? Ewu ùvwa n’Nzambi. Ne cyàkenzà bwa Yèyè ikalè muumuke ku Logos muyè ku musunya . . . Cinyi . . . ? Mmunyi mùdi . . . ? Cyàkenzekelà cyòci aci ncinyi? Tusunsa tutaanu kumpàlà kwa cyòci aci, Yèyè’s ùvwa . . . S’Úvwa Logos awu. Kàdi cyàkenzàYe ncinyi? Wàkoolola anu cyanza . . .

162 Mpindyewu, mibidi yetu mmyenza ne bintu dikumi ne bisambombo bya ku buloba. Aci tudi bamanyè. Mmwenza

ne binshidimba, ne—ne—ne ndambù wa kàlisiyumù, ne—ne mpiitùloulù, ne bukênkè bwa mu cibwàshìbwàshì, ne tupwishipwishi, ne bikwabo. Byònsò biswikakaja pàmwè, ki bìdì byènza mubidi ewu, bifùma ku lupwishi lwà buloba. Wèwè utu udyà byàkudyà. Paùdì udyà byàkudyà apu, bìdì byàndamuka . . . byùmuka ku lupwishi, ne byôbi mbifùme ku lupwishi, ne bìdì anu—anu bitungunuka. Mubidi wèbè, bwa mubidi wèbè, kî mmushìilàngànekù ne wà kabalù, anyi ne wà ngombe, anyi ne wà cintu cikwabo kanà cyònsò eci to. Cidi anu mubidi.

¹⁶³ Nenku, mulùmyànà, wèwè udi utùmbisha mubidi; kàdi nyuma awu's ngùdì ne musùukà munda, mwanèètù wanyì. Ncya bushuwa's. Kàdi musunya wèbè's wùdì anu lupwishi lwetu lwà buloba elu, mùdì wà nyama amu. Musunya wèbè kî mmutàmbekù wà nyama to. Ne paùdì walakana mubidi ne byùdì umòna abi, walakana bakàjì, walakana bintu bishìilèshìilàngàne byònsò ebi, cidi anu bunyama. Ncya bushuwa. Ncya bushuwa. Kabìvwa bìkèngela wèwè kucyènza to. Nyuma wa Nzambi neàkulombòlè ne neàkutèèkè pa mwaba mutùmbùke kutàmba aci. Ncya bushuwa menemene.

¹⁶⁴ Mpindyewu, kàdi apa, Tèòfàní munene ewu mwimàne mwaba awu. Ncinyì . . . Yehowah Nzambi munene awu, nudi bamanyè cyàkambàYè anyi? Wàkoolola anu cyanza cyanàànà e kwangata dyanza dya tupwishipwishi, kwangata ndambu wa bukênkè, ne kubyèlamù, nùnkù ewu, kwenza ne: “Hyu,” mubidi, ne kubwelamu anu cyanàànà. Kwàjìkì.

¹⁶⁵ KwambaYè ne: “Lwâ apa, Ngabùdyèlè,” Mwarkanjèlò munene awu. Yèyè ne: “Hyu.” “Bwelà mu awu nanku.”

¹⁶⁶ “Lwâ apa, Mikàèlà,” Mwanjelo udi ku dyàbalùmè Dyèndè awu. “Hyu.” Bwa . . . “Wèwè bwela mu awu nanku.”

¹⁶⁷ Nzambi, ne Banjelo babidi, bààkalwa pànwapa bènda bènda mu mubidi wà buntu, ne bààkanwà mabèèlè a ngombe, bààkadyà màntekà a ku mabèèlè awu, ne bààkadyà màmpà a bukula bwa nsèka, ne bààkadyà munyìllyì wà kànà kàà ngombe. Banjelo babidi ne Nzambi. Ki mùdì Bible mwambè. M'Melekisedekè awu, uvwa Abraham mutwilàngàne Nendè, pàvwàye ùfùmina ku dishebeya dya bamfùmù apu. Ki Mwànà wa Nzambi nyawù.

¹⁶⁸ Tùtungunukààyi, mu Ebèlù emu, nshapìtà wa 7, mmwambè ne: “Kàdi muvwijìibwe mu mulongo wà mufwànàngàne ne Mwànà wa Nzambi.” S'ki Yèyè awu. Wàkenza bintu byònsò ku Yèyè. Ki kumùpàtukaYè buludì, ne kushintululaYè anu lupwishi alu kwalukilalù cyàkàbìdì ku lupwishi, ne kwalukilaYè buludì mu Butùmbi.

¹⁶⁹ Kadi Banjelo abu, mbenzè anu bàsùngila Lotà ne Màndàmù Lotà, ne mukàjì awu kacya anu wàtàngila paanyimà. KwambaYè, kubàmbilaYè bwa kabàcyènjìku kabidi tò. Ki Bòbò kwalukila buludì mu—mu Bwikadi bwa Nzambi.

170 Mpinyewu, ditèkemena kaayi ditùdi naadi mu Diitabuuja dinene edi mutùdi tusadila dilòòlò edi's wè! Nzambi udi ne mwoyi awu, Yehowah awu, Dikunji dya Kapyà adi, ùdi neetu. Ùdi ùdileeja Yèyè mwine mu bukolè, ne mu cyenzedi, ne ùbàndisha. . . Ùbàlekela bàMukwàta Fòtò, Yehowah umwèumwè awu. Mwànà wa Nzambi uvwa mufùme ku Nzambi awu, mwalùkile ku Nzambi, ne musòmbèle mu Ekeleeziya Wendè bwa kashidi. S'ki Yèyè awu.

171 Yèyè ùdi ne mènà ètù mu Mukàndà Wèndè, ne mucìpù wà ku Yèyè mwine, bwalu kakwèna udi muMutàmbe wa kudicìpila ku yèyè to, bwa ne Neàtùbiishè ku lufù mu ditùkù dya ndekeelu. “Ewu udi udyà Munyìnyì Wànyì, ne ùnwa Mashì Áànyì, ùdi ne Mwoyi wà kashidi, ne Mèmè nèmmbùishè ku lufù ku ditùkù dya ndekeelu. Ewu udi ulwa Kùndì, Ncyàkumwipatakù to nansha bya munyì. Ewu udi umvwa Díyì Dyànyì, ne wìtabuuja Yèyè udi muNtùme, ùdi ne Mwoyi wà kashidi, ne kààdyàkupicìlakù mu dipiila nansha, kàdi wàmànyì kuumuka ku lufù wàyì ku Mwoyi.”

172 Yèyè umwèumwè awu ùvwa anu mwa kwolola cyanza ne kwangata dyanza dya kàlìsiyumù ne dya binshidimba, kwenza ne: “Hyu,” ne ki wèwè awu cyàkàbidì. Ne dìnà dyànyì didi mu Mukàndà Wèndè. Akà-akà! Akà-akà-akà-akà! Cìndì nditàcìshìla mùdi tukaaya twànyì twènda tùshààla tukòbàme ncinyì, mùndì ngenda nkùlakaja? Nànshapù. Diditàcìsha nansha dikese.

173 Mwanèètù Mike, òmwè dya ku àdi pànshì aa, ùbèneshiibwè, mwanèètù, pààlwà mpungi munene awu, mwadi wà mpungi awu, ne Yòzefù awu neàpatukè. Aleluuyah! Yèyè neàmbe ne: “Bànà!” “Hyu.” Ki twètù abu's, benza mu cifwànyikijilu Cyèndè; bânà batekètè bwa kashidi, bukùlákàji bwàyì; mabèèdi, ntàtu, tunynganyinga byàmànyì kujìmina. Butùmbì bwìkalè kùdì Nzambi udi ne mwoyi's wè!

174 Ku Yèyè awu nkùdiYe wàkwila, leelu ewu, ku Mwan'Èndè awu. “Mu bikondo bya kale ne mu mishindu mishìilèshìilàngàne Yèyè wàkaakwila kùdi mupròfetà, kàdi mu ditùkù dya ndekeelu edi ku Mwan'Èndè, Kilisto Yesu.” Ùdi wàkula ne mwoyi wà muntu ne muntu udiYè mubiikile. Wèwè ní ukààdikù mumvwè Díyì Dyèndè anyì muMuumvwè ùkookola ku mwoyi wèbè, swàku kùDìpàcìku nansha.

Tùsambilàayi.

175 Taatù wa mu Dyulu, dilòòlò edi, bu mutùdi ne disànka dìngì dya kumanya, ku mbangilu wa Mukàndà mufùndila beena Ebèlù ewu, mwàkaalukilà Pólò buludì mu ma-Evanjeeliyo. Yèyè kàvwakù mufwànyine kucyàngacila ku byambàmbà anyì ku dilabula kampànda nansha. Ùvwa muswè bwa twètù kumanya cìvwà Bulelèlà. Ne yèyè wàkaalukila buludì mu ma-Evanjeeliyo, ne yèyè. . . wàkaalukila mu Dipungila Dikùlukulu, Evanjeeliyo wàkayiishiibwàbo bóbò awu. Ki kumwènyè, ku Dipungila

Dikùlukulu aku, bindidimbì byònsò ne bifwànyikijilu. Ki bwa cinyi tudi ne Mukàndà munene wà Ebèlù ewu dilòlò edi. Nenku tudi tuWùmòna, Mukalenge, ne tudi baWùnangè. Ne munda mwa bikondo, Wówò wàkooshiibwa, Wàkatangalajiiibwa, bàakateeta bwa kuWùmusha, kàdi ng'Wówò ewu mutùngùnùke ne kupeepa anu bu ne kakwèna bwalu. Bwalu Wèwè utu mwambè ne: “Maulu ne buloba nebijiminè, kàdi Mèyi Àànyi kaàkujiminakù to.”

176 Dìbà adi mwena mpatà mmufwànyine kwamba ne: “Ee, wèwè's wambi ne: 'Pòlò ngudi mufunde eci's.'” Kì m'Pòlò to, kàdi n'Nzambi uvwa munda mwa Pòlò awu; Kampànda mufùki awu nguvwa munda mwa Pòlò.

177 Anu mwàkadìbi mu Davidi amu, pàakambàye ne: “Ncyàkwitabakù bwa Wa cijila Wanyi àmone dibola, anyi Ncyàkulekelakù musùkà Wèndè mu iferno nansha.” Nenku Mwànà wa Nzambi wàkangacila Mèyi awu kùdì mupròfètà awu, ne wàkabwela buludì mu difù dya iferno. Ne wàkamba ne: “Shimbùlaayi ntempèlù ewu, ne Mèmè nèmjuulè mu matùkù asatu.” Ne Yèyè wàkacyèza, bwalu Dìyi dya Nzambi kadyènakù mwa kupangila to; katobà nansha kàmwe kakèènakù mwa kupangila to. Mushindu mwine wutùdì tusàkidila Nzambi bwa cyòci eci's, Ulimà-Tuumimà munene ewu, ne tumanya ne malabula ètù dilòlò edi, Mukalenge, àdi àpenya bukènkè anu pa Bible ewu mene! Tudi balediibwe cyàkàbìdì, biikàle ne Nyuma Mwímpe.

178 Nzambi munanga, kwòkò mulùme anyi mukàji kaaba aka dilòlò edi, mwànà wa balùme anyi wa bakàji, utu kacya kàyikù mwanji kudijaadikila cyòci eci to, mmunyi mùdiye mufwànyine kubùika ku lufù piikalàku kakùyi Mwoyi munda amu? Kaa, yèyè's ùdi wàmba ne: “Ndi ne Mwoyi.”

179 Kàdi Bible mmwambè ne: “Mukàji udi musòmbèle mu bisànkasanka mmufwè pàdiye ne mwoyi apu. Wèwè udi wamba mùdi ne Mwoyi, kàdi's udi mufwè. Wèwè ngudi ulaka mukana ucyàmba awu,” mùdi Bible mwambè, “wamba mùdi ne Mwoyi, kàdi mwikàle mufwè. Wèwè udi wamba mùdi mubanji ne kùyì dijinga ne cintu; kàdi kwèna mumanyè ne udi mwena dikènga, ne mupèlè, ne butakà, ne mpofo, kàdi kùyì mucimanyè to.” Nenku ki ngiikàdilù wa maèkèleeziyà dilòlò edi nyèyè awu, Mukalenge. Mushindu mwine wùdibo bàpangila bintu binène, bya mushinga ebi's.

Bya kumanya ne Yehowah Nzambi munene awu, Udi anu mwa kupàtwila ku... Yèyè wàkamba ne: “Ntwàdìlaayi Mèmè tuumishipa tukese atu.” Byàkakèngela bwa kwangataYè tuumishipa atu bwa—bwa kwenza naatù cintu kampànda. Bìleeja ne, dibìishiibwa dya ku lufù divwa ne cya kwikala cintu kampànda, bwa kwenza naaci cintu kampànda. Yèyè kààkenza anu mishipa cyanàànà to, kàdi Wàkenza mishipa miipika, ne

mâmpà moosha. Ne Yéyè wàkadìishila bantu binunu bitaanu ku tuumishipa tukese tutaanu . . . tuumilungu tukese twà mâmpà ne tuumishipa tubidi. Éyì Mukalenge, bìvwa mu byanza Byèndè, ne Yéyè ùvwa Mufùki awu. Kàdi byàkakèngela bwa kwikalaYè ne cintu kampànda mu cyanza Cyèndè.

Nzambi, swàku bwa tùdìtèèkè twètù biine mu byanza Byèndè, dilòlò edi, twàmbè ne: “Éyì Nzambi, ngangàtèku anu mûndi emu. Ne pààlwà ndekeelu wa mwoyi wànyì, swàku bwa nye ne ditèkemena edi divwà munda mwànyì, mumanyè ne ndi mulediibwe cyàkàbìdì, ne Nyuma Webè wáfidi bujaadiki pàmwe naanyì, ne wáfidi bujaadiki pàmwe ne nyuma wanyì ne, ndi mwan’Èbè wa balùme, anyì mwan’Èbè wa bakàji.” Nenuku ku ditùkù dya ndekeelu adi, Wèwè neùbàbìishè ku lufù. Enzàku nanku, Taatù.

¹⁸⁰ Ne patùcìdì ne mitù yetu miinyika apa, nkufwànyìnekù kwikala muntu udi mufwànyìne kwela cyanza muulu, kwamba ne: “Wamvùlukakù, Mwanèètù Branham, mu disambila. Ndi muswè bwa Nzambi kummanyaYèku díbà dya. . . kumpàlà kwa mèmè kushiyangana ne buloba ebu, bwa Yéyè wàmmanyakù mu mushindu wà ne neÀmbìkilè mu dìnà. Mèmè nèngàdamunè.” Mukalenge àkubènèshèku wèwè mwanàanyi wa balùme. Nzambi àkubènèshè, ne wèwè; ne wèwè, inàbànzà. Kùdikù mukwabo muntu anyì? Elà wèwè anu cyanza muulu cyanàànà. Ambà ne: “Nsambidìlèku, Mwanèètù Branham.” Cyòci aci ki citwènzà. Nzambi àkubènèshè, wèwè nsongàakàji ewu. Abi mbimpè.

¹⁸¹ Mpindyewu, pàdì mutù wèbè mwinyika apa, munkacì mwa kusambila, nèngìikalè mwa kwimba citùminyì cya musambu ewu:

Kwàlakanyi mabanji a patupù a pa buloba ebu
to,
Àdì ànyangukà lùkàsà aa,
Ibàkilà ditèkemena dyebe pa bintu bya
Cyendeleele,
Byòbi kabyàdyàkujìminakù to!
Kwàta ku cyanza cya Nzambi cìdì kaciyì
cìshintuluka!
Kwàta ku cyanza cya Nzambi cìdì kaciyì
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyì
cìshintuluka!

¹⁸² Pàdiye wimba ku cisanji mpindyewu apu, ne mutù wèbè mwinyika, udikù mwa kwolola anu cyanza, kwamba ne: “Eyowa, Mukalenge, cyànyì ncyòci eci” anyì? Necyènzè cinyì? Necileejè ne nyuma webè, munda mwebe, mmwangàte dipàngadika. “Ndi muswè cyanza Cyebe, Mukalenge.” Nzambi àkubènèshè, wèwè

kànà kàà bakàjì katekète. “Nêngélè cyanza cyànyì muulu.” Nzambi àkubènèshè, wèwè mwànà mukese wa bakàjì, kaaba aka. Abi mbilenga, munanga wanyì. Nzambi, udi mumanyè’s, ùdi ne disànkà dya kukumòna wenza nanku awu. “Lekèlaayi bânà bakese bàlwe Kùndì.”

¹⁸³ “Ndi muswè, Nzambi, bwa Ùnkwàtèku ku cyanza. Ne mu ditùkù adi, ndi muswè bwa ngìkalakù mu cyanza Cyebe; bwa ne, paWàbìikilà, ngálwa.” Eyowa, mùvwà Lazàrò amu. Nzambi àkubènèshè, mwanèètù wa bakàjì.

Pààjikà lwendu lwetu,
Byòbì ne wèwè uvwa ne lulamatu kùdi
Nzambi,
Cisòmbelu cyebe cilenga ne cibàlakana mu
Butùmbi,
Musùuka wèbè mwambwibwe newùmònè.

Ciwènzà ncinyì mpindyewu, dîbà adi?

Kwàta ku cyanza cya Nzambi cìdì kaciyì
cìshintuluka!
Kwàta ku cyanza cya Nzambi cìdì kaciyì
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyì
cìshintuluka!

¹⁸⁴ Taatù wa mu Dyulu, byanza byàbùngì nyewu byela muulu, mu kaadisangisha kakese aka, dilòòlò edi ne, mbaswè kukwàta, dilòòlò edi, ku cyanza Cyebe cìdì kaciyì cìshintuluka, cya Cyendeleele aci. Pa kumanya ne cìdì cìfidìibwe Kùdì. . . Wèwè udi mwambè ne: “Mémè. . . Bònsò bàdì Taatù muMpèeshe nebàlwe Kùndì, ne nansha umwe wa kùdìbo kààkujìmina nansha. Ne Mémè nèmmbùishè ku lufù ku ditùkù dya ndekeelu. Kènàku mwa kufwà, kènàku mwa kupìcila ku cilumbulwidi nansha, kàdi ùdi ne Mwoyi wà Cyendeleele, wà Cyendeleele.” Ne kùdi Mwoyi wà Cyendeleele anu wùmwèpèlè. Awu ngùdi wùfuma kùdi Nzambi, nkààyendè. Wùdi n’Nzambi. Ne twètù tudi tulwa citùpà cya Nzambi, mu mushindu wà ne tudi bânà bàà balùme ne bàà bakàjì bàà Nzambi. Patùdi ne Nyuma wa Nzambi munda mwetu, tudi twela meeji bu Nzambi. Tudi twela meeji ku bwakàne ne ku cijila, ne tudi tuteeta bwa kwikalala ne nsòmbelu wa ùMusànkisha.

¹⁸⁵ Enzàku, Mukalenge, bwa Mwoyi wà mushindu awu wùbwelèku munda mwa muntu yònsò udi mwelè cyanza muulu. Ne aba bàvwà bàkèngelà bwa kwikalabò beelè byanza muulu, kàdi kabàyi beelè abu, ndi ndòmba bwa Wikalèku naabò. Enzàku nanku, Taatù. Nenku pààjikà lwendu, pààjikà mwoyi, swàku bwa twàbwela mu ditalala mu ditùkù adi, pàmwè Nendè, mu mwaba wutwikalàku katùyi mwa kukùlakaja, katùyi mwa

kusaama, katùyi mwa kupeta lutàtu nansha lùmwè. Patwàmbà kukùfika, watùlamakù bàà disànka ne bàà dyèsè, biikàlè tuMutùmbisha, bwalu tudi tulòmba nùнку mu Dîna Dyèndè. Amen.

¹⁸⁶ Nwênù bônso beena kwitabuuja, mpindyewu, twèlàayi anu byanza muulu cyanààna ne twìmbàayi cipungulujidi aci.

Kwàta ku cyanza cya Nzambi cidi kaciyi
 cishintuluka!
 Kwàta ku cyanza cya Nzambi cidi kaciyi
 cishintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

¹⁸⁷ Mpindyewu tùwìmbilayaaku mu matàma. Panùcidi nwenza nanku apu, mutumba neebe, ambà ne: “Nzambi àkubènèshè; mutumba.” Labùlàku muntu kampànda udi musòmbe ku luseke lwebe aku awu ku cyanza. “Nzambi àkubènèshè.” Ku nseke yònsò yibidi mpindyewu. Ku nseke yònsò yibidi, bàlabùlè ku cyanza. “Nzambi àkubènèshè, mutumba. Nzambi ikalè neebè.” “Ibàkilà ditèkemena dyebe pa bintu bya Cyendeleele.”

Doc, ndi mumanyè ne bìdikù, mwanèètù. Ndi mumanyè ne wèwè ukààvwakù, Mwanèètù Neville, kùkaadi ntàntà mule.

Pààjikà lwendu elu,

Nebyenzekè, òmwè dya ku matùkù aa.

Byòbi ne tuvwà ne lulamatu kùdi Nzambi,

Netùmonè Mwanèètù Seward Kuntwaku.

Cisòmbedi cyebe cya cibàlakana ne
 cibàlakana, mu Butùmbi,
 Musùuka wèbe mwambwibwe newùcimònè!

Kwàta ku cyanza cya Nzambi cidi kaciyi
 cishintuluka!

Mémè ntu munangè dikuukwila adi, paanyimà pàa diyiisha.

Kwàta ku cyanza cya Nzambi cidi kaciyi
 cishintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

Cikondo ncyûle ne dishintuluka dyà
 cìmpicìmpi,
 Cintu cya pa buloba nansha cìmwè
 kacyàkushààlakù cishìmàte to,
 Ibàkilà ditèkemena dyebe pa bintu bya
 Cyendeleele,
 Kwàta . . .

Tùtumàayi mèsù kùdìYe, Yéyè udi kàyì ùmwènèka udi
 munkaci mwetu mpindyewu awu, ne tùMukuukwìlaayi anu
 cyanàànà mpindyewu patùdi twimba apa.

Kwàta ku cyanza cya Nzambi cidi kaciyi
 cìshintuluka!
 Kwàta ku cyanza cya Nzambi cidi kaciyi
 cìshintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cìshintuluka!

Ditalala! Ditalala! Ditalala dya dikèmesha,
 Mukuukwìlaayi anu cyanàànà mpindyewu.

Dìpweka . . .

Diyiisha dyàjikì. Edi ndikuukwila.

Pwekèlàku pa nyuma wetù bwa kashidi,
 mmùndì ndòmba,
 Mu búngì bwa mavwala a dinanga kabùyi
 dipima.

Dyówèshaayi anu mu Yéyè amu cyanàànà.

Ditalala! Ditalala! Ditalala dya dikèmesha,
 Dìpweka difùmina . . .

Mpokolo munene awu, Ùdi munkaci mwa kukànguka.

. . . kuulu;

Pwekèlàku pa nyuma wetù bwa kashidi,
 mmùndì ndòmba,
 Mu búngì bwa mavwala a dinanga kabùyi
 dipima.

Aci kacyènakù cyènza cintu kampànda anyi?

. . . Ditalala dya dikèmesha,
 Dìpweka difùmina Kuulu kwa Taatù wetù;
 Pwekèlàku pa nyuma wetù bwa kashidi,
 mmùndì ndòmba,
 Mu búngì bwa mavwala a dinanga kabùyi
 dipima.

Kakwènakù cintu kampànda mu Cyôci aci, anu cya cibanjike
 ne cipòle anyi?

¹⁸⁸ Ndi ndikonka ní kùdikù mubèèdi muswè kulaabiibwa maanyì ne kumusambidilabò. Yéyekù, angàtà anu kaaba keebe cyanààna. Ewu nyinábànza udi mu dikalù dya balèmà wàwa anyì? Mulekèlè àshaalèmu anu nanku. Nèndwe, mmusambidilè. Kabyàkukèngela bwa yèyè kujuuka mu dikalù amu to. Kùdikù mukwabo anyì?

Kaa, kanwènaayikù banangè eci citùpà cya disangisha anyì? Mbanganyì bàdiku bàdyùmva, bamanyè anu ne Bwikadi bwa Nzambi bùdi kaaba aka? S'ki bùndi ngamba ebu. Umwèumwè awu... Wèwè's udi udyùmva anu bu... Mbanganyì bàdiku bàdyùmva anu bu ne udi mufwànyine kwela mbilà mikolè? Mpindyewu twánjàayibì anu kumòna. Udi udyùmva anu bu ne cintu munda mwebe amu nciswè kwela mbila mikolè. Nwamònu anyì?

Nditalala! Ditalala! Ditalala dya dikèmesha,
Dìpweka dìfùmina Kuulu kwa Taatù;
Pwekèlaku pa nyuma wanyì bwa kashidi,
mmùndi ndòmba,
Mu bùngi bwa mavwala a dinanga kabùyì
dipima.

Kenkà pambidi pàànyì,

¹⁸⁹ Patùcidi mu dikuukwila apa, netwìkalè mwa kulaaba babèèdi maanyì mpindyewu, ne kubàsambidila. Kwènaku mwa kuvwila eku nunku anyì, inábànza?

¹⁹⁰ Eci cidi cyùmvwija cinyì? “Disambila dya diitabuuja nedisungilè mubèèdi.” Bònsò mu disambila mpindyewu, imbilaayi anu musambu awu mu matàma. Anjì elaayibì meeji Yesu munkaci mwa kwondopa babèèdi.

Ndi mmulaaba maanyì...?...



EBÈLÙ, NSHAPÌTÀ WÀ KUMPÀLA LUA57-0821
(Hebrews, Chapter One)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù dilòlò, mu matùkù 21 a ngondo wa mwandamukùlù, cidimu cya 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org